

Řexbar Ašebḥan n Yeccu Lmasiḥ s ufus n Yuḥanna

Lmasiḥ idweř d bnađem

1 ¹Deg umezwaru tuya iḡa wawař, awař tuya-t ak-d Arebbi, awař tuya-t d Arebbi. ²Wa iḡa ak-d Arebbi deg umezwaru. ³Zzayes i d itwaxřeq kuřci u nnebřa netta war d itwaxřeq uřa d ict n tmesřact i d itwaxeřqen. ⁴Dayes teḡa tudart, tudart tuya-tt d tifawt n bnađem. ⁵Tifawt tařeqq di taḡest, taḡest war tt-d tiwid. ⁶Tuya-t d ij n bnađem, issekk it-id Arebbi, qqaren as Yuḥanna. ⁷Wa yusi-d i chadet ḥima ad iched i tfawt, ḥima ad zzayes amnen marra. ⁸Netta war iḡi ca d tifawt, maca netta itwassekk-d ḥima ad iched i tfawt. ⁹Aqqa tifawt n tidett i itticken tifawt i kuř bnađem, tuya tettas-d yar ddunnit. ¹⁰Netta tuya-t di ddunnit, zzayes tetwagg ddunnit, ddunnit war t tessin ca. ¹¹Yusi-d yar wi iḡan nnes, maca wi iḡan nnes war t iqbiř. ¹²Maca marra inni t iqebřen, iwca asen řřulřa ḥima ad dewřen d tarwa n Arebbi, i yinni ittammen deg isem nnes, ¹³inni war d ixřiqen uřa zeg idammen uřa zi min ixš weysum *n bnađem* uřa zi min ixš weryaz, maca zi Arebbi i d itwaxeřqen. ¹⁴Awař idweř d aysum, izdey jaraney, neccin nezra aeuḡi nnes, aeuḡi n uyenni n Mmis zi yar Babas i iccuren s nniemet d tidett. ¹⁵Iched xas Yuḥanna, iřaya, inna “D wa min xef nniy ‘Wenni i d ya yasen awarni ayi, netta idweř zzati, minzi netta tuya-t qbeř inu.’” ¹⁶Zi řekmař nnes niwi-d marra, nniemet x nniemet. ¹⁷Ttawrat temmewc zi Musa, maca nniemet d tidett, usint-id zi Yeccu Lmasiḥ. ¹⁸Uřa d ijj war iřri Arebbi, maca ayenni n Mmis i iḡan deg weřsin n Tbatat d netta i zzayes issxebbaren.

Chadet n Yuḥanna Amseřđas x Yeccu

Mat. 3:1-12; Mar. 1:2-8; Luk. 3:15-17

¹⁹Ta d chadet n Yuḥanna řami d ssekken Wudayen ca n ikehhanen d ilawiyen zi Urcalim ḥima ad t sseqsan “Min teenid cek?” ²⁰Tuya iched, war issnuffar ca. Uca iched *ammu* “Nec war ḡiy ca d Lmasiḥ.” ²¹Sseqsan t “I min teenid cek xenni? Ma d cek d *amkacaf* Iliya?” Inna “War ḡiy d necc.” “Ma d cek d *amkacaf*?” Yarr-d “Lla.” ²²Nnan as

“Xenni min teenid cek, ħima ad narr i yinni d aney-d issekken, min teqqared x yixef nnek?”²³Inna

*“Nec d tmija i ittrayan di řexra ‘Seggmem abrid n Arebbi nican!’,
am mammec inna umkacaf Icaeya.” Ica. 40:3*

²⁴Nitni tuya twassekken-d zeg Ifarisiyyen ²⁵uca sseqsan t, nnan “Mařa war teğid ca d Lmasiř uřa d Iliya uřa d amkacaf, i xenni mayemmi tesseyđaşed?” ²⁶Yuĥanna yarr-d xasen, inna “Nec sseyđaşey deg waman, maca aqqa din ijjen jarawem i war tessinem ca, ²⁷netta d wenni i d ya yasen awarni ayi, netta iğa qbeř inu, nec war sdiheğey ad fesyeğ ifiřan n tsira nnes.” ²⁸Man aya imsar di Bayteanya ħar ujemmađ n Lurdun, mani tuya Yuĥanna isseyđaş.

Yeccu Lmasiř d Izmar n Arebbi

²⁹Tiwecca nnes Yuĥanna ižra Yeccu iggur-d ħares, inna “Xzarem, aqqa-t d Izmar n Arebbi i ikkessin ddnub x ddunnit! ³⁰D wa min xef nniğ ‘Ad d yas awarni ayi ij n weryaz, yusi-d zzati, minzi netta tuya-t qbeř inu.’ ³¹Nec war t ssineğ ca, maca ħima ad itwassargeb ħar Israyil, x uyenni usiğ-d ħima ad sseyđaşey deg waman.” ³²Yuĥanna iched, inna “Zriğ Arruĥ ihwa-d am ict n tedbirt zeg ujenna, tarsa xas. ³³Nec war t ssineğ ca, maca wenni d ayi d issekken ħima ad sseyđaşey deg waman, netta inna ayi ‘Wenni x tezrid ihwa-d xas Arruĥ uca yarsa xas, d wa d wenni isseyđaşen s Arruĥ Iqeddsen’. ³⁴Nec zriğ uca cehdeğ belli netta d Mmis n Arebbi.”

Imeĥđaren imezwura n Lmasiř

³⁵Tiwecca nnes εawed, tuya Yuĥanna ibedd ak-d tnayen n imeĥđaren nnes. ³⁶Ixzar ħar Yeccu i tuya igguren uca inna “Xzarem, d wa d Izmar n Arebbi.” ³⁷Tnayen n imeĥđaren sřin as am tt iqqar uca đfaren Yeccu. ³⁸Inneqřeb-d Yeccu, izri ten đeffaren t-id, isseğsa ten “Min xef tarezzum?” Nitni nnan as “A Rabbi - min ixs ad yini ‘A Amsēřmad’, mani tzeddyed?” ³⁹Inna asen “Araĥem-d, ad tzarem.” Ruĥen akides, zřin mani izeddeğ, qqimen akides ass nni, tasaεeet tuya-tt εřaĥař d εecra. ⁴⁰Andrawus umas n Simεan Buřrus tuya-t d ijjen zi tnayen nni i isřin aya zi Yuĥanna uca đeffaren t. ⁴¹D wa i

yufin amezwaru umas Simean, inna as “Aqqa nufa ‘Massiya’”, isem wanita ixs ad yini ‘Lmasih’. ⁴²Issiweđ it-id ħar Yeccu. Ixzar dayes Yeccu, inna “Cek d Simean, mmis n Yuna, ad ac řayan ‘Sifas’”, isem wanita ixs ad yini ‘Buřrus’ (=ařru). ⁴³Tiwecca nnes tuća ixs Yeccu ad irah ħar Ljalil uca yufa Filibbus. Yeccu inna as “Đfar ayi-d!”. ⁴⁴Filibbus tuća zi Baytřayda, zi tendint n Andrawus d Buřrus. ⁴⁵Filibbus yufa Natanayil, inna as “Nufa wenni min xef yura Musa di ttawrat d imkacafen, Yeccu mmis n Yusef zi Nnařira.” ⁴⁶Natanayil inna as “Ma attay izemmar ad d teffey zi Nnařira ca n tcuni?” Filibbus inna as “Arah-d, texzared.” ⁴⁷Yeccu izra Natanayil iggur-d ħares, inna xas “Xzar, d wa d ij n Usrayili nican, war dayes bu řyecc.” ⁴⁸Natanayil inna as “Manis d ayi tessned?” Yeccu yarr-d, inna as “Zřiy cek swadday i wartu qbeř mma ad cek-d iřaya Filibbus.” ⁴⁹Natanayil yarr-d xas “A ‘Rabbi’, cek d Mmis n Arebbi, cek d ajeđid n Israyil.” ⁵⁰Yeccu yarr-d, inna as “Ma tumned s min d ac nniy ‘Aqqa zřiy cek swadday i wartu’? Ad tżared min iđan ktar zi man aya.” ⁵¹Inna as “S tidett, s tidett, ad awem iniy, zi ssa d tsawent ad tżarem ajenna innurzem u lmalakat n Arebbi ttařyent hekkwant x Mmis n bnađem.”

Lmuejiza tamezwarut n Lmasih di Qana

2 ¹Deg wass wiss třata temsar din ict n tmeyra di Qana di Ljalil uca tuća din yemmas n Yeccu. ²Uřa d Yeccu d imeđdaren nnes twaeardēn-d ħar tmeyra. ³Řami iqđa binu, tenna as yemmas n Yeccu “War ħarsen bu binu!” ⁴Yeccu inna as “Min jar ayi akidem, a tamyart? Tasaēet inu war d tiwiđ ead!” ⁵Yemmas tenna i imsexxaren “Min d awem i ħa yini, ggem t.” ⁶Tuća din setta n iqeddwađ n wezru daysen aman, mmarsen dinni am mammec nnumen tteggēn Wudayen řuđu, kuř ijjen zżaysen ħares řqedd n tnayen ař třata ‘imetriten’ (=eřařař tmayin ař meyya u icrin litru). ⁷Yeccu inna asen “Ccurem iqeddwađ s waman.” Uca ccuren ten s waman ař aqemmum. ⁸Řexdenni inna asen “Řexxu agmem-d zżaysen, wcem t i bab n wurar.” Uca ssiwđēn t. ⁹Umi bab n wurar iqeđeb aman i idewřen d binu, - maca netta war issin manis d ikka, maca imsexxaren inni i d as-d yugmen aman, ssen -, iřaya-d bab n tmeyra x umuřay. ¹⁰Inna as “Kuř bnađem ittqeddān binu ařebħan d amezwaru. Mařa inewjiwen swin ařtas, ad asen iwc binu war

iħrin, maca cek txemmřed binu iŝebħen aħ i řexxu.”¹¹D wa d beddu n řeeřamat i igga Yeccu di Qana di Ljalil, isseđhar-d aeuđi nnes uca umnen zzayes imeħđaren nnes.¹²Awarni man aya iruħ, ihwa-d ħar Kafarnaħum, netta d yemmas, d aytmas, d imeħđaren nnes uca qqimen din ca n wussan war iđi aħas.

Yeccu ittazzeř x isebbaben zi taddart iqeddsen

Mat. 21:12-13; Mar. 11:15-17; Luk. 19:45-46

¹³Řami d tiweđ Basxa, řeid n Wudayen, issgaeed Yeccu ħar Urcalim.
¹⁴Yufa di taddart iqeddsen inni din izznuzan ifunasen d wuđi d idbiren uřa d iřarrafen n tenęacin inni din iqqimen.¹⁵Igga ij n urekkuđ zeg iseywan uca yuzzeř xasen marra zi taddart iqeddsen uřa d uđi d ifunasen. Uca izeđe isuldiyyen n iřarrafen di tmurt uca iqřeb ttwabeř.¹⁶Inna i yinni izznuzan idbiren “Kksem man aya ssa. War d ttarram ca taddart n Baba d taddart n ssuq!”¹⁷Imeħđaren nnes eeqřen belli tuya tura “Cđaret i taddart nnek icca ayi.”¹⁸Arrin-d xas Wudayen, nnan as “Man řeeřamet i d aney i ħa temřed, belli *aqqa ħarek řħeqq ħima* ad tegged man aya!”¹⁹Yeccu yarr-d, inna asen “Hedmem taddart-a iqeddsen uca di třata n wussan ad tt ssbeddey.”²⁰Xenni nnan as Wudayen “Taddart-a iqeddsen tebna di setta u arebein n iseggwusa, ma cek ad tt-id tessbedded di třata n wussan?”²¹Maca netta tuya issawař x taddart iqeddsen n arrimet nnes.²²Awarni řami d ikkar Yeccu zeg imettinen, xenni eeqřen imeħđaren nnes min d asen inna uca umnen deg wedlis d wawař i inna Yeccu.²³Umi t tuya di Urcalim di řeid n Basxa umnen waħas deg yisem nnes, minzi řrin řeeřamat i igga.²⁴Maca netta war isscen ca ixef nnes ħarsen, minzi netta issen iten marra,²⁵minzi netta war iħdij ca ad iched ħed x bnađem, minzi netta issen min iđan di bnađem.

Yeccu d Nikudimus, amħar n Wudayen

3¹Tuya din ij n bnađem zeg Ifarisiyyen qqaren as Nikudimus, netta d ij n umħar n Wudayen.²Yusi-d ħar Yeccu s ħiřet, inna as “A Amseřmad, neccin nessen belli cek d Amseřmad i d yusin zi ħar Arebbi. War izemmar uřa d ijj ad igg řeeřamat-a i teggid cek, mħir mařa akis Arebbi.”³Yeccu yarr-d xas, inna “S tidett, s tidett, ad ac iniħ, uřa d ijj war izemmar ad iřar tageldit n Arebbi mħir

maġra itwaxġreq-d zeg ujenna.” ⁴Nikudimus inna as “Mammec izemmar i bna dem ad d ixġreq di tewsar nnes? Ma izemmar ad yadef ict n twaġra nneġni deg ueddis n yemmas maġend ad d itwaxġreq?” ⁵Yeccu yarr-d xas “S tidett, s tidett, ad ac iniy, maġra ca n yijjen war d ixġriq ca s waman u s Arruġ, war izemmar ad yadef di tgeldit n Arebbi. ⁶Min d itwaxeġqen zeg weysum, netta d aysum. Min d itwaxeġqen zi Arruġ, netta d Arruġ. ⁷War ttbehtem ca maġra nniy awem, ittxeġsa kenniw ad d tetwaxeġqem zeg ujenna. ⁸Asemmiġ ittšuġ manis ixs, tettesġrid i ušuġi nnes, war tessined ca manis d ittas uġra mani ittraġ, ammu eawed marra wenni d itwaxeġqen zi Arruġ.”

⁹Nikudimus yarr-d, inna as “Mammec i ġa yegg ad yiġri man aya?” ¹⁰Yeccu yarr-d, inna as “Cek d Amseġmad n Israyil, war tessined ca man aya? ¹¹S tidett, s tidett, ad ac iniy, neccin nessawaġ x min nessen, neched x min neġra, waxxa amenni kenniw war teqbiġrem ca chadet nney. ¹²Maġra ssiwġrey awem x tmesġrayin n tmurt, kenniw war timnem, mammec i ġa teggem ad tamnem maġra ssiwġrey awem x tmesġrayin n ujenna. ¹³Uġra d ijj war yuġri ġar ujenna mġir wenni d ihwan zeg ujenna, netta d Mmis n bna dem wenni iġan deg ujenna. ¹⁴Amecnaw mammec issgaeeed Musa afiyar di řefyafi, ammu ittxeġs ad itwassgaeeed Mmis n bna dem, ¹⁵ġima marra wenni zzayes i ġa yamnen war ittmetti ca, maca ad ġares tiġri tudart i řebda. ¹⁶Ammu ixs Arebbi ddunnit aġ mani d iwca ayenni n Mmis ġima kuġ ijjjen wenni zzayes i ġa yamnen, war ittmetti ca maca ad ġares tiġri tudart n řebda. ¹⁷Minzi Arebbi war d issekk ca Mmis ġar ddunnit ġima ad iġaseb ddunnit, maca issekk it-id ġima ad zzayes issenjem ddunnit. ¹⁸Wenni zzayes i ġa yamnen war ittetwaġaseb ca, maca wenni war ittimnen ca aqqa itwaġasab zi řexxu minzi netta war yumin ca deg yisem n uyenni n Mmis n Arebbi. ¹⁹D wa d řeġkam, aqqa tifawt tusi-d ġar ddunnit, iwdan xsen taġest x tfawt, minzi řexdayem nsen tuġa-tent d tieeffanin. ²⁰Marra wenni itteġgen řexdayem tieeffanin, icarreh tifawt, war d ittis ca ġar tfawt, ġima war twassbanent ca řexdayem nnes. ²¹Wenni itteġgen tidett ad d yas ġar tfawt, ġima ad banent řexdayem nnes, aqqa twaggent di Arebbi.”

Yeccu d Yuḥanna Amseyḏas

²²Awarni man aya yusi-d Yeccu d imeḥḏaren nnes ɣar tmurt n Yahudiyya, isseɛdu din ca n řweqt akidsen uca tuɣa isseyḏas. ²³Uřa d Yuḥanna tuɣa isseyḏas di ɛaynun i d yusin tťarf i Salim, minzi dinni aman aťtas, uca *iwdan* usin-d dinni uca twassyɛḏšen. ²⁴Minzi Yuḥanna tuɣa ɛad war immenḏar ca di řehbes. ²⁵Imsar ij n umḥarweḏ jar imeḥḏaren n Yuḥanna d ij n Wuday x mammec i ɣa yiři řuḏu. ²⁶U nitni usin-d ɣar Yuḥanna, nnan as “A Amseřmad, xzar, wenni akik iġan ɣar ujemmaḏ n Lurdun, wenni min xef tcehded, aqqa netta isseyḏas u marra tťasen-d ɣares.” ²⁷Yuḥanna yarr-d, inna “Bnadem war izemmar ad iqbeř uřa d ict n tmesřact mařa war d as temmewc zeg ujenna. ²⁸Kenniw simant nwem tcehhdem belli necc nniɣ ‘Necce war ġiɣ ca d Lmasiḥ, maca aqqa necc twassekkeɣ-d zzates’. ²⁹Wenni i ɣar teġa tesřit, netta d amuřay. Ameddukeř n umuřay wenni ittbeddan zzates, ittesřa ɣares, ifarreḥ s řefraḥet tameqqrant s tmijja n umuřay. Ammu tetwakemmeř uřa d řefraḥet inu. ³⁰Ittxeřš ad igma netta u necc ad neqsey. ³¹Wenni i d yusin zi sennej, netta sennej i marra. Wenni iġan zi tmurt, zi tmurt issawař. Wenni d yusin zeg ujenna, netta sennej i marra, ³²u netta icehhed zi min ižra d zi min isřa u chadet nnes war tt iqebbeř uřa d ijjen. ³³Wenni iqebbřen chadet nnes d wenni issarsen řxeť n ufus nnes belli aqqa Arebbi d tidett. ³⁴Minzi wenni d issekk Arebbi, issawař s wawařen n Arebbi, minzi netta war itticc ca Arruḥ s řmizan. ³⁵Tababat ittexs i Tamemmit uca igga as deg ufus nnes kuřci. ³⁶Wenni ittammen di Tmemmit, ɣares tudart i řebda, maca wenni war ittimnen ca di Tmemmit, war ižarr tudart, maca lyaḏab n Arebbi ad xas iqqim.”

Yeccu issawař ak-d ict n temyart zi Samariya

4 ¹Umi issen Sidi, aqqa Ifarisiyyen sřin belli Yeccu ittegg u issyeťtas imeḥḏaren ktar zi Yuḥanna, ²- waxxa netta simant nnes war isseyḏis ca, maca imeḥḏaren nnes - ³iffey-d zi Yahudiyya, iruḥ ɛawed ɣar Ljalil. ⁴Tuɣa ittxeřš ad icuqq di Samariya. ⁵Netta yusi-d ɣar ict n tendint zi Samariya qqaren as Suxar, tenni ɣar tťarf n iyyar i iwca Yaɛqub i mmis n Yusef. ⁶Tuɣa din anu n Yaɛqub. Umi yuḥeř Yeccu zeg ibriden, iqqim amenni ɣar wanu, tasaeet tuɣa-tt eřaḥař d setta.

⁷Tusi-d ict n temyart zi Samariya ħima ad tagem aman. Yeccu inna as “Ewc ayi ad swej!”⁸ minzi imeħġaren nnes tuġa ruħen ħar tendint ħima ad syen macca. ⁹Tamyart n Samariya tenna as “Mammec teggid tettared zzayi ad teswed, aqqa cek d Uday u necc d tamyart n Samariya?” Minzi Udayen war nnumen ttemšurufen ak-d Isamariyyen. ¹⁰Yeccu yarr-d, inna as “Maelik tessned timewca n Arebbi d wenni d am iqqaren ‘Ewc ayi ad swej’, iři cem tettar tt zzayes uca netta ad yiři iwc am aman iddaren.” ¹¹Tenna as temyart “A Sidi, war ħarek i zi i ħa tagmed uca anu yuġeġ, manis i d ħa tawyed aman iddaren?” ¹²Ma cek d ameqqran zi jedditney Yaequb wenni d aneġ iwcin anu, iswa zzayes, netta d tarwa nnes d řebħayem nnes?” ¹³Yeccu yarr-d, inna as “Marra wenni i ħa iswen zeg waman-a, ad ifud eawed, ¹⁴maca wenni i ħa iswen zeg waman i d as i ħa wceġ necc, netta war ittfađi eemmarš. Minzi aman i d as i ħa wceġ necc ad dayes dewřen d timizabin n waman ad ffyent ħar tudart n řebda.” ¹⁵Tamyart tenna as “A Sidi, ewc ayi aman-a ħima war ttfideġ, war d ttiseġ ead da, ħima ad agmeġ.” ¹⁶Inna as “Ruħ, řaya-d i weryaz nnem uca dweř-d danita.” ¹⁷Tamyart tarr-d, tenna as “War ħari bu weryaz.” Yeccu inna as “Tessiwřed nican umi tennid ‘war ħari bu weryaz’, ¹⁸minzi tuġa ħarem xemsa n yeryazen d wenni ħarem řexxu, war iġi bu d aryaz nnem. Man aya tennid d tidett.” ¹⁹Tamyart tenna as “A Sidi, ttwařiy belli cek d amkacaf. ²⁰Řejdud nney eebden i *Arebbi* deg wedrar-a, kenniw teqqarem belli di Urcalim mani iġa wemcan i di icuwwar ad neebed.” ²¹Yeccu inna as “Ttiqq ayi, a tameřtut, aqqa tasaeet ad d tas i di war ttebbdem Tababat uřa deg wedrar-a uřa di Urcalim. ²²Kenniw ttebbdem min war tessinem, maca neccin neebbed min nessen, minzi asenjem zeg Wudayen. ²³Tasaeet ad d tawed, nettat aqqa-tt řexxu, belli inni iebbden nican, ad eebden Tababat s arruħ d tidett. Minzi Tababat yarezzu inni t i ħa iebbden ammu. ²⁴Arebbi d Arruħ u inni t iebbden, ittxeřša asen ad eebden s arruħ d tidett.” ²⁵Tamyart tenna as “Nec ssney belli ‘Massiya’ umi qqaren ‘Lmasiħ’ ad d yas. Xmi i d ħa yas netta, ad aneġ ini kuřci.” ²⁶Yeccu inna as “Aqqa d necc, wenni kim issawařen.”

²⁷Xenni usin-d imeħġaren nnes, ttejben řami t ufin issawař ak-d ict n temyart. Maca uřa d ijj war ini ‘Min tarezzud?’ niġ ‘Mayemmi akides tessawařed?’ ²⁸Tejja temyart aqedduħ nnes s waman, tuyur

yar tendint, tenna i iwdan ²⁹“Araḥem-d, aqqa ij n weryaz inna ayi marra min ggiy. Ma attay netta d Lmasih?” ³⁰Iwdan ffyen-d zi tendint, usin-d yares.

³¹Jar u jar ttaren zzayes imeḥḍaren nnes, nnan “A Amseřmad, ecc!” ³²Maca netta inna asen “Necq aqqa yari ij n macca ḥima ad zzayes ccey, war t tessinem ca kenniw.” ³³Imeḥḍaren mmseqsan jarasen “Ma iwi as-d ḥed macca?” ³⁴Yeccu inna asen “Macca inu aqqa ad ggey min ixw wenni d ayi-d issekken uca ad kemřey řxedmet nnes. ³⁵Ma war teqqarem ‘Iqqim ead arebea n iyuren uca ad d tas řřabet?’ Necq ad awem iniy, sgaεdem tiřřawin nwem, xzarem deg iyyaren, aqqa waryen wejden i řřabet. ³⁶Wenni injaren ad iksi řmunet nnes, iyru řyięet i tudart n řebda, ḥima ad farḥen jmiε inni izarrēen d yinni imejjaren. ³⁷Minzi di man aya aqqa awař-a d tidett ‘Ijjen ad izare u wennedni ad imjar’. ³⁸Necq ssekkeę-d kenniw ḥima ad temjarem waxxa war texdimem kenniw. Innedni tuya xeddmem, kenniw tudfem yar řxedmet nsen.”

³⁹Ařřas n Isamariyyen zi tendint nni umnen zzayes x wawař n temyart i tuya icehhdem “Netta inna ayi marra min ggiy”. ⁴⁰Řami yares-d usin Isamariyyen, sseqsan t ḥima akidsen iqqim uca iqqim akidsen tnayen n wussan dinni. ⁴¹Ktaren ead inni yumnen s wawař nnes. ⁴²Nnan i temyart “Necqin war nettimen ca ead zi min d aney tennid, minzi necqin nesřa it s yixef nney, nessen belli wa s tidett d Lmasih, amsenjem n ddunnit.”

Asgenfi n mmis n uxeddami n ujeęid

Mat. 8:5-13; Luk. 7:1-10

⁴³Awarni tnayen n wussan iffeę-d ssenni, iruḥ yar Ljalil. ⁴⁴Minzi Yeccu simant nnes iched belli amkacaf war yares bu ccan di tmurt nnes. ⁴⁵Umi d yusa yar Ljalil, řqan t-id ljaliliyyen, minzi nitni zrin marra min igga di řeid di Urcalim, minzi uřa d nitni usin-d yar řeid. ⁴⁶Yusi-d εawed yar *tendint* n Qana di Ljalil mani yarra aman d binu. Tuya din ij n uxeddami n ujeęid di Kafarnaḥum yares mmis ihřec. ⁴⁷Řami isřa belli Yeccu yusi-d zi Yahudiyya yar Ljalil, iruḥ yares, isseqsat t ḥima ad d ihwa maḥend ad issgenfa mmis, wenni tuya igguren ad immet. ⁴⁸Yeccu inna as “Kenniw war ttimnem ca mařa war tezrim řeřřamat d Imuejizat.” ⁴⁹Inna as uxeddami n ujeęid “A Sidi, hwa-d yar wadday

qbeř mma ad immet uhenjir inu.” ⁵⁰Yeccu inna as “Ruḥ aqqa mmic iddar.” Aryaz ittiqq deg wawař i d as inna Yeccu uca iruḥ. ⁵¹Řami d ihwa, mmeřqan akides isemyan nnes, nnan as ‘Aqqa ahenjir nnek iddar’. ⁵²Isseqsa ten x tsææet min di iggenfa. Nnan as “İdennađ ęar sebea tejja xas tmesi.” ⁵³Xenni issen babas belli aqqa imsar ęar tsææet i di tuęa iqqar Yeccu ‘Aqqa mmic iddar’. Yumen netta d marra inni n taddart nnes. ⁵⁴Ta d řeřamet wiss tnayen i igga Yeccu zeg wami d iffeę zi Yahudiyya ęar Ljalil.

Asgenfi n ij n umehřuc ęar ugeřmam n Baytisdá

5 ¹Awarni man aya yiweđ-d řeid n Wudayen uca igææed Yeccu ęar Urcalim. ²Yar tewwart n wuęi di Urcalim tuęa din ij n ugeřmam umi qqaren s teıbranit ‘Baytisdá’, tuęa ęares xemsa n ikulwaren ak-d ibilaren. ³Daysen tuęa iqqim ij n řęaci d ameqqran n imehřac d idaryařen d inedbařen d iqeįdařen, ttrajan anhezzi n waman. ⁴Minzi ij n lmalak n Arebbi tuęa ihekkwa-d deg ugeřmam deg ict n řweqt, issenhezza aman n tařa. Wenni i d ęa ihwan d amezwaru awarni anhezzi n waman ad itwaggenfa, mammec mma ięa řehřac nnes. ⁵Tuęa din ij n bnađem dayes řehřac řmijař n tmenya u třatin n iseggwusa. ⁶Yeccu ięra it, isenned dinni, issen belli tuęa-t din aęęas zeg wami, inna as “Ma tersed ad teggenfid?” ⁷Yarr-d xas umehřuc “A Sidi, war ęari bu bnađem wenni d ayi i ęa issehwan ęar ugeřmam xmi i ęa twassenhezzen waman. Xmi ttraęey necc, ihekkwa-d wenneđni zzati.” ⁸Yeccu inna as “Kkar, teksid tassut nnek, tuyured!” ⁹Deęya iggenfa bnađem nni uca iksi tassut nnes, yuyur. Man aya tuęa deg wass n ssebt. ¹⁰Nnan Wudayen i wenni tuęa itwassgenfan “Wa d ass n ssebt, war ęarek bu řęeqq ad teksid tassut nnek.” ¹¹Yarr-d xasen “Wenni d ayi issgenfan, inna ‘Ksi tassut nnek, traęed!’.” ¹²Uca sseqsan t “Min iena bnađem-a i d ac innan ‘Ksi tassut nnek, traęed?’” ¹³Wenni itwassgenfan war issin min iena netta, minzi Yeccu innejra minzi aqqa din aęęas n řęaci deg wemcan nni. ¹⁴Awarni man aya yufi t Yeccu di taddart iqeddsen, inna as “Xżaret, aqqa teggenfid, war ttegg bu dđnub ead, ģima war d ac ittemsar min iæeffnen ktar.” ¹⁵Aryaz iruḥ, ixebbar Udayen belli d Yeccu it issgenfan.

Tababat d Tamemmist d yijjen

¹⁶X uyenni xsen Wudayen ad darrcen x Yeccu, arezzun ad t n̄yen, minzi igga man aya deg wass n ssebt. ¹⁷Maca Yeccu yarr-d xasen “Aqqa Baba ixeddem aṛ yida u necc eawed aqqa xeddmey. ¹⁸Di ssibbet-a arezzun Wudayen ead ktar ḥima ad t n̄yen, war iḡi waha minzi ixaṛef ssebt, maca uṛa minzi iqqar aqqa Arebbi d Babas, ittarra ixef nnes d Arebbi. ¹⁹Yeccu yarr-d, inna asen “S tidett, s tidett, ad awem iniy, Tamemmit war izemmar ad igg uṛa d ict n tmesṛact s yixef nnes, myir maṛa izra Tababat ittegg it. Min mma ittegg netta uṛa d Tamemmit ittegg amenni. ²⁰Tababat ittexs Tamemmit uca isscen as marra min ittegg uca ad as isscen řexdayem timeqqranin x tina ḥima ad tdehcem. ²¹Am mammec d issnekkar Tbatat imettinen uca itticc tudart, amenni uṛa d Tamemmit itticc tudart i wenni ix. ²²Tababat war ittḥasab uṛa d ijj, maca iwca lḥisab marra i Tmemmit, ²³ḥima ad weqqaren marra Tamemmit am ttweqqaren Tababat. Wenni war ittweqqaren Tamemmit, war ittweqqar ca Tababat wenni it-id issekken. ²⁴S tidett, s tidett, ad awem iniy, wenni ittesṛan i wawaṛ inu uca ittamen deg wenni d ayi-d issekken, ḡares tudart n řebda, war d ittis ca ḡar lḥisab, maca netta aqqa immuṭi zi řmewt ḡar tudart. ²⁵S tidett, s tidett, ad awem iniy, ad d tas tsææet, aqqa-tt řexxu, i di imettinen ad sṛen tmijja n Mmis n Arebbi u inni i ḡa isṛen, ad ddaren. ²⁶Maca am mammec ḡar Tbatat ḡares tudart deg ixef nnes, ammu i iwca uṛa i Tmemmit ḥima ad ḡares tiṛi tudart deg ixef nnes. ²⁷Uca iwca as řṣultḡa ḥima ad iḡaseb, minzi netta d Mmis n bna dem. ²⁸War tteejibem ca s man aya, aqqa ad d tas tsææet i di marra inni iḡan deg imeḡṛan ad sṛen tmijja nnes ²⁹uca ad d ffyen inni iggin taṣebḡant ad kkaren ad raḡen ḡar tnukra n tudart uca inni iggin tuæeffna ad kkaren, ad raḡen ḡar tnukra n lḥisab. ³⁰Necc war zemmarey ad ggey ca zeg ixef inu. Am mammec ttesṛiy, ad ḡasbey u lḥisab inu d řḡeḡḡ, minzi necc war arezzuy min xsey, maca min ixw wenni d ayi-d issekken. ³¹Maelik cehhdey i ixef inu, iṛi aqqa chadet inu war teḡi ca nican. ³²Aqqa din ijjen nneḡni wi xafi icehhdn. Necc ssney belli chadet i xafi icehhed, aqqa d tidett i teḡa. ³³Kenniw tessekkem-d ḡar Yuḡanna uca netta iched i tidett. ³⁴Maca necc war qebbrey ca chadet n bna dem. Maca necc qqarey man aya ḥima ad tetwassnejmem. ³⁵Netta d řefnar iyareqqen, ittlillicen, kenniw texsem ad tfaṛḡem s tfawt nnes ḡar ict n tsææet. ³⁶Maca necc ḡari ict

n chadet d tameqqrant x tenni n Yuĥanna, minzi řexdayem i d ayi iwca Tbatat ĥima ad tent kemmřeĥ, řexdayem nni i tteggey cehhdent simant nsent aqqa d Tababat d netta i d ayi-d issekken. ³⁷Tababat wenni d ayi-d issekken, d netta i xafi icehhden. Kenniw eemmarř war tesřim tmijja nnes uca war teźrim ca addud nnes ³⁸uca awař nnes war daywem ittyimi ca řebda, minzi kenniw war tettimmen ca deg wenni it-id issekken. ³⁹Arzum deg idlisen, minzi ittyiř awem aqqa daysen tudart n řebda uca aqqa-ten d inni i xafi icehhden. ⁴⁰Waxxa amenni kenniw war tettexsem ad ĥari d tasem ĥima ad ĥarwem tiři tudart. ⁴¹War qebbřeĥ ca aeuġi n iwdan, ⁴²maca necc ssney kenniw, aqqa kenniw war ĥarwem bu tayri n Arebbi deg ixef nwem. ⁴³Necc usiĥ-d s yisem n Baba, kenniw war d ayi tqebbřem ca. Mařa yusi-d ca n yijjen s yisem nnes, ad t tqebřem. ⁴⁴Mammec tzemmarem ad tamnem, mařa kenniw tettexsem aeuġi n wayawya, maca war tarezzum ca x ueuġi n uyenni n Arebbi? ⁴⁵War d awem ittyiř ad zzaywem cetcıĥ ĥar Tbatat. Wenni zzaywem i ĥa icetcan d Musa x wenni tessrusam asitem nwem. ⁴⁶Mařa tumnem zi Musa, ad tiři tumnem dayi, minzi netta yura xafi. ⁴⁷Mařa kenniw war tuminem ca deg idlisen nnes, mammec i ĥa teggem ad tamnem deg wawařen inu?"

Asecci n xemsa ařaf

Mat. 14:13-21; Mar. 6:30-44; Luk. 9:10-17

6 ¹Awarni man aya iruĥ Yeccu ĥar ujemmad n řebĥar n Ljalil, wenni d řebĥar n Tibiriyas. ²Idfar it-id ij n řĥaci d ameqqran, minzi zrin řeēřamat nnes i igga i imehřac. ³Řexdenni igaeēed Yeccu ĥar wedrar uca iqqim dinni ak-d imeĥđaren nnes. ⁴Basxa, řeid n Wudayen, war d as iqqim ca. ⁵Řexdenni issgaeēed Yeccu tiřřawin nnes uca, umi izra ij n řĥaci d ameqqran yusi-d ĥares, inna i Filibbus "Manis i ĥa nsey aĥrum, ĥima ad ccen ina?" ⁶Inna ammu ĥima ad t ijarreb, minzi netta simant nnes issen min i ĥa yegg. ⁷Yarr-d xas Filibbus "Aĥrum s mitayn n ddinar war ten ittqeddi ĥima ad iki kuř ijjen zzaysen drus." ⁸Ijjen zeg imeĥđaren nnes, netta d Andrawus, umas n Simēan Buřrus, inna as ⁹"Aqqa da ij n uĥenjir ĥares xemsa n tecnifin n imendi d tnayen n iseřman, maca anect uya qae i wařřas?" ¹⁰Yeccu inna "Sĥimem iwdan." Tuĥa din ařřas n řeĥtic deg wemcan nni. X uyenni qqimen yeryazen, aqqa-ten di xemsa ařaf idsen

eřařař. ¹¹Yeccu iksi ticnifin, iqada uca ibđa tent x imehđaren nnes u imehđaren nnes wcin tent i inni iqqimen. *Iwca* amenni eawed zeg iseřman ełahsab anect ixsen *ad ccen*. ¹²Řami jjiwnen, inna i imehđaren nnes “Yrum iřeqqwaz icetřen, ĥima war ittđeyye walu.” ¹³Yrun uca eemmare tenεac n tsuđatin s iřeqqwaz n xemsa n tecnifin n imendi i icetřen awarni řami ccin. ¹⁴Řami žrin iwdan řeεřamet i igga Yeccu, nnan “Wa d tidett d amkacaf i d ittassen řar ddunnit.” ¹⁵Umi issen Yeccu, belli ad d asen nitni, ad t řřen s uyiř ĥima ad t ggen d ajeđid, xenni innejra řar wedrar, ĥaca netta wehđes.

Yeccu iggur x waman n řebřar

Mat. 14:22-27; Mar. 6:45-52

¹⁶Řami d tewđa tmeddit, hwan-d imehđaren nnes řar řebřar. ¹⁷Nyin di tyarrabut, qeđeen řebřar řar Kafarnařum. Iřa teđa tađest tqarreb-d u Yeccu tuřa ead war řarsen-d yusi. ¹⁸Řebřar innehweř minzi asemmiđ tuřa ittšud ařas. ¹⁹Ařami tuřa qeđdfen řqedd n eřařař xemsa u eicrin ař řřatin 'istadiyyen' (=eřařař *arebea ař setta kilumiter*), řrin Yeccu iggur x řebřar, ittqarreb-d řar tyarrabut uca ggweden. ²⁰Inna asen “Aqqa d necc, war tteggwedem ca.” ²¹Nitni xsen ad t ssqebřen di tyarrabut uca tařarabut tiweđ deřya řar řbarr i řar iđa ttrahen. ²²Tiwecca nnes ibedd řřaci řar ujemmad n řebřar, řrin belli war din tuři uřa d ict n tyarrabut nneđnit myř icten, tenni mani dayes udfen imehđaren nnes u Yeccu war yudif ca di tyarrabut ak-d imehđaren nnes, maca aqqa imehđaren nnes ruřen wehđsen. ²³Usint-id tyarruba nneđnit zi Tibiriyas zzat i wemcan mani ccin ařrum řami tuřa iqada Sidi. ²⁴Řami iřra řřaci aqqa war din iđi Yeccu uřa d imehđaren nnes, udfen uřa d nitni di tyarrabut uca usin-d řar Kafarnařum arezzun x Yeccu.

Yeccu netta d ařrum n tudart

²⁵Řami t ufin řar ujemmad n řebřar, nnan as “A Amseřmad, meřmi d tusid da?” ²⁶Yeccu yarr-d xasen, inna “S tidett, s tidett ad awem iniy, kenniw tarezzum xafi, war iđi umi težrim řeεřamat maca umi teccim ařrum uca tejjwnem. ²⁷War ttxedmem i macca ixessaren, maca i macca ittyiman i tudart n řebđa, tenni d awem i řa iwc Mmis n bnadem, minzi Tababat, issars řřabee nnes xas.” ²⁸Nnan as “Min i řa negg, ĥima

nzemmar ad negg řexdayem n Arebbi?”²⁹ Yarr-d Yeccu, inna asen “Ta d řxedmet n Arebbi, aqqa ad tamnem deg wenni d issekk netta.”

³⁰Nnan as “Man řeřamet i řa tegged řima ad nřar uca ad zzayek namen? Man řxedmet i řa tegged?”³¹ Řejdud nney ccin ‘manna’ di řexřa am mammec tura ‘Netta iwca asen-d ařrum zeg ujenna řima ad t ccen’.”³² Inna asen Yeccu “S tidett, s tidett ad awem iniy, war iři d Musa i d awem iwcin ařrum zeg ujenna, maca Baba itticc awem ařrum n tidett zeg ujenna.”³³ Minzi ařrum n Arebbi d netta wenni d ihekkwan zeg ujenna uca itticc tudart i ddunnit.”³⁴ Nnan as “A Sidi, ewc aney-d řebda ařrum-a.”³⁵ Yeccu inna asen “Nec d ařrum n tudart. Wenni řari-d i řa yasen, war ittřiz eemmarř u wenni dayi i řa yammen war ittfidi eemmarř.”³⁶ Maca necc nniř awem, aqqa kenniw teřrim ayi, waxxa amenni kenniw war tuminem ca.³⁷ Marra min d ayi i řa iwc Tbatat, ad řari-d yas u wenni řari-d i řa yasen, war t sstuffuyey ca řar barra.”³⁸ Minzi necc hwiř-d zeg ujenna, war iři ca řima ad ggeř min xsey necc, maca řima ad ggeř min ixw wenni d ayi-d issekken.”³⁹ D man aya min ixw Tbatat wenni d ayi-d issekken, aqqa marra min d ayi iwca, war zzayes ssweddarey walu, maca ad t-id ssnekkarey deg wass aneggaru.”⁴⁰ D man aya min ixw netta wenni d ayi-d issekken, aqqa kuř ijj wenni i řa iřaren Tamemmit uca ad dayes yamen, ad řares tiři tudart n řebda uca ad t-id ssnekkarey deg wass aneggaru.”

⁴¹ Udayen cetcan zzayes, minzi inna “Nec d ařrum i d ihwan zeg ujenna.”⁴² Nnan “Ma d wanita war iři bu d Yeccu, mmis n Yusef, neccin nessen babas d yemmas? Mammec i řa yini ‘Nec hwiř-d zeg ujenna?’”⁴³ Yeccu yarr-d xasen, inna “War tcetcam ca jarawem.”⁴⁴ War izemmar uřa d ijj ad řari-d yas, myř mařa ijebd it-id Tbatat wenni d ayi-d issekken uca necc ad t-id ssnekkarey deg wass aneggaru.”⁴⁵ Aqqa tura deg *idlisen n imkacafen* ‘Nitni marra ad twassřemden zi Arebbi’. Xenni kuř ijj wenni t isřin u iřmed it zi Tbatat, ad řari-d yas.”⁴⁶ Uřa d ijj war iřri Tababat myř wenni iřan zi Arebbi. Wa iřra Tababat.”⁴⁷ S tidett, s tidett ad awem iniy, wenni dayi ittamnen, ad řares tiři tudart n řebda.”⁴⁸ Nec d ařrum n tudart.”⁴⁹ Řejdud nwem ccin ‘manna’ di řexřa uca mmuten.”⁵⁰ Man aya d ařrum i d ihekkwan zeg ujenna, řima marra ad zzayes ccen, war ttmettin ca.”⁵¹ Nec d ařrum iddaren i d ihwan zeg ujenna. Mařa

ijjen icca zeg weyrum-a, ad iddar i řebda. Ayrum wenni i ya wcey, netta d aysum inu i ya wcey i tudart n dduunit.”

⁵²Udayen mmenyen jarasen, nnan “Mammec izemmar wa ad aney iwc aysum nnes ħima ad t necc?” ⁵³Yeccu yarr-d xasen “S tidett, s tidett, ad awem iniy, mařa war teccim ca aysum n Mmis n bnamdem uca ad teswem idammen nnes, xenni war řarwem-d tiři tudart deg ixef nwem. ⁵⁴Wenni i ya iccen aysum inu uca ad isu idammen inu, ad řares tiři tudart n řebda u necc ad t-id ssnekkarey deg wass aneggaru. ⁵⁵Minzi aysum inu d macca d tidett uca idammen inu d tsessit n tidett. ⁵⁶Wenni i ya iccen aysum inu uca ad isu idammen inu, ad dayi iqqim u necc dayes *εawed*. ⁵⁷Am mammec d ayi-d issekk Tbatat iddaren uca necc ddarey zi Tbatat, ammu *εawed* ad zzayi iddar wenni zzayi i ya iccen. ⁵⁸Wa d ayrum i d ihwan zeg ujenna. War iři ca amecnaw mammec ccin řejdud nwem ‘manna’ uca mmuten, maca wenni i ya iccen ayrum-a, ad iddar i řebda.” ⁵⁹Inna man aya deg usinagug am tuya isseřmad di Kafarnařum.

Ařas n imeřdaren bnan tteggwejjen x Yeccu

⁶⁰Ařas n imeřdaren nnes, umi sřin man aya, nnan “Awař-a iqseř. Wi izemmaren ad as iseř?” ⁶¹Issen Yeccu deg yixef nnes, aqqa imeřdaren nnes cetcan x man aya, xenni inna asen “Ma man aya d řefđiřet i kenniw? ⁶²I mammec mařa teřrim Mmis n bnamdem ittgaεεad řar mani iřa ięa qbeř? ⁶³Arruř d wenni itticken tudart. Aysum war ineffeε i walu. Awařen i d awem nniy, daysen arruř d tudart. ⁶⁴Maca aqqa din ca jarawem inni war yuminen.” Minzi Yeccu issen zeg umezwaru man yen ięan inni war yuminen u man wen t i ya isellmen. ⁶⁵Inna “S uyenni d awem nniy ‘War izemmar uřa d ijj ad řari-d yas myir mařa temmewc as zi Tbatat’.”

⁶⁶Zi řweqt nni dewřen ařas zeg imeřdaren nnes řar đeffar, war qqimen ca gguren akides. ⁶⁷Inna Yeccu i teneε *n imeřdaren nnes* “Ma uřa d kenniw texsem ad tuyurem?” ⁶⁸Simean Buřrus yarr-d xas “A Sidi, wi řar i ya nrař? Cek řarek awařen n tudart n řebda, ⁶⁹aqqa neccin numen u nessen aqqa cek d Lmasiř, Mmis n Arebbi iddaren.” ⁷⁰Yeccu yarr-d xasen “Ma war iři d necc i kenniw ixđarey s teneε? Uca ijjen zzaywem d ibřiř.” ⁷¹Inna man aya x Yahuda, *mmis* n Simean Isxariyuři, minzi wanita tuya ixš ad t isellem u netta d ijjen zi teneε.

Yeccu iggur yar řeid n Txuzan n ifetwan di Urcalim

7¹Awarni man aya tuřa Yeccu iggur di Ljalil, war ixš ad irah ad inneđ di Yahudiyya, minzi Udayen tuřa arezzun ad t nřen. ²Iqarreb-d řeid n Wudayen *umi qqaren* ‘Tixuzan n ifetwan’. ³Nnan as aytmas ‘Ffeř ssanita, ruř yar *tmurt n* Yahudiyya ĥima uřa d imeřđaren nnek zemmaren ad řaren man řexdayem nnek i tettegged. ⁴Uřa d ijj war ittegg ca n tmesřact s tnuffra, mařa netta s ixef nnes yarezzu ad d iđhar yar barra. Mařa teggid timesřayin-a, scen ixef nnek i ddunnit.’ ⁵Minzi uřa d aytmas war dayes uminen ca. ⁶Inna asen Yeccu ‘Řweqt inu ead war d tiwiđ, maca řweqt nwem aqqa-tt řebda akidwem. ⁷Ddunnit war tzemmar ad kenniw tcarh, maca nettat tcarh ayi, minzi necc cehhdeř xas belli řexdayem nnes d tieeffanin. ⁸Ruřem kenniw yar řeid-a. Necc war ttriheř ca yar řeid-a, minzi řweqt inu ead war tkemmeř.’ ⁹Umi d asen inna ammu, iqqim di Ljalil. ¹⁰Maca umi ruřen aytmas, iruř uřa d netta yar řeid, war d iđhar yar barra, maca igga axmi innufar. ¹¹Udayen arezzun xas di řeid, nnan ‘Mani iřa wanita?’ ¹²Ařas zi řřaci temtumen xas, ca zזaysen nnan ‘Netta d aryaz d ařebħan’ Maca inneđni nnan ‘Lla, issxarriq x řřaci.’ ¹³Maca uřa d ijj war xas issiweř s břayřay zi ssibbet n tiggwudi zeg Wudayen. ¹⁴Maca ařami iedu wezyen zi řeid, iruř Yeccu yar taddart iqeddsen, isseřmad. ¹⁵Udayen dehcen, nnan ‘Mammec igga netta issen idlisen am war ten iřri ca?’ ¹⁶Yeccu yarr-d xasen ‘Tařuri inu war teęi ca inu, maca zeg wenni d ayi-d issekken. ¹⁷Mařa ijjen ixš ad igg min ixš Arebbi, ad issen ma aqqa tařuri-ya zi Arebbi niř aqqa ssawařeř zeg yixef inu. ¹⁸Wenni issawařen zeg yixef nnes yarezzu aeuęi nnes, maca wenni yarezzun aeuęi n wenni t-id issekken, aqqa netta d tidett, war dayes bu řęecc. ¹⁹Ma war ięi d Musa i d awem iwcin ttawrat? Maca uřa d ijj zzaywem war ittegg ttawrat? I mayemmi xenni tarezzum ad ayi tenęem?’ ²⁰Řřaci yarr-d ‘Dayek ccitan, wi yarezzun ad cek ineř?’ ²¹Yeccu yarr-d xasen ‘Xedmeř ict n řxedmet uca kenniw tettbehtem marra. ²²S uya Musa iwca awem-d axtan, axtan maca war ięi ca zi Musa, maca zi řejdud nwem u kenniw txettneř i bnađem di ssebt. ²³Mařa iqbeř bnađem ad itwaxten di ssebt ĥima war tetwarezzi ttawrat n Musa, ma ad xafi txeyyqem řami sgenfiř bnađem ikmeř di ssebt? ²⁴War ĥekmem ca zi min iđharen yar barra, ĥekmem s ij n řħukm iseggdan.’

Ma Yeccu netta d Lmasiḥ?

²⁵Ca n iwdan zi Urcalim nnan “Ma war iḡi d wa i yarezzun ad t nyen?
²⁶Maca xzar, issawař s btaɣtaɣ, war d as qqaren walu. Attay aqqa ssnen imeqqranen *n weydud* nican belli s tidett wanita d Lmasiḥ?
²⁷Maca nessen wa, manis netta. Maca xmi i d ɣa yas Lmasiḥ, uřa d ijj war issin manis netta.” ²⁸Ařami tuya isseřmad di taddart iqeddsen, iřaya Yeccu, inna “Kenniw tessnem ayi u tessnem manis necc. Necc war d usiɣ s yixef inu, maca wenni d ayi-d issekken aqqa-t d tidett, kenniw war t tessinem ca. ²⁹Necc ssney t, minzi necc zzayes u netta d wenni d ayi-d issekken.” ³⁰Xenni arezzun ad t ttfen, maca uřa d ijj war xas issars afus, minzi tasaæet nnes war d tiweđ ead. ³¹Attaş zi řyaci umnen zzayes, nnan “Xmi i d ɣa yas Lmasiḥ, ma ad igg řeřamat ktar zi tina i igga wa?”

Udayen arezzun ad ttfen Yeccu

³²Ifarisiyyen sřin min xas itemten řyaci uca arruyas n ikehhanen d Ifarisiyyen ssekken-d imxazniyyen ħima ad t ttfen. ³³Yeccu inna “Necc ad kidwem qqimeɣ drus ead, xenni ad raħey ɣar wenni d ayi-d issekken. ³⁴Ad xafi tarzum, war dayi tetteřtifem u mani i ɣa iřiy necc, war tzemmarem ad d tadfem. ³⁵Xenni nnan Wudayen jarasen “Mani i ɣa irah wanita mani war nzemmar ad t naf. Ma xenni ixs ad irah ɣar Iyunaniyyen izeğeen maħend ad isseřmed Iyunaniyyen. ³⁶Min iena wawař-a i inna ‘Ad xafi tarzum, war dayi tetteřtifem ca u mani i ɣa iřiy necc, war tzemmarem ad d tadfem?’”

Mařa ifud ħed, ejj it ad ɣari-d yas uca ad isu!

³⁷Deg wass aneggaru ameqqran zi řeid, ibedd-d Yeccu uca iřaya, inna “Mařa ifud ħed, ejj it ad ɣari-d yas uca ad isu. ³⁸Wenni dayi i ɣa yammen, am mammec inna wedlis, ad zzayes azzřen iyezran n waman iddaren zeg ueddis nnes.” ³⁹Inna man aya x Arruħ i ɣa qebřen inni dayes ittammen. Minzi Arruħ *Iqeddsen* war d asen immewc ead, minzi Yeccu war itwasseuđi ead. ⁴⁰Ca zi řyaci xenni, umi sřin awař-a, nnan “D wa d amkacaf s tidett.” ⁴¹Inneđni nnan “Wa d Lmasiḥ”, maca ca nneđni zzaysen nnan “Ma iggur ad d yas Lmasiḥ zi Ljalil? ⁴²Ma war ini wedlis, aqqa Lmasiḥ ad d yas zi zzariet n Dawud, zi dcar n Baytlaħm, manis d yusa Dawud?” ⁴³Uca imsar umsebđi n řyaci

di ssibbet nnes. ⁴⁴Ca zzaysen xsen ad t tfffen, maca uŕa d ijj war xas issars ifassen. ⁴⁵Xenni usin-d imxazniyyen ɣar arruyas n ikehhanen u ɣar Ifarisiyyen, u nitni nnan asen *i imxazniyyen* “Mayemmi war t-id tiwym?” ⁴⁶Arrin-d xasen imxazniyyen “Ċemmarŝ war issiweŕ uŕa d ijj n bna dem am mammec *issawaŕ* bna dem-a!” ⁴⁷Arrin-d xasen Ifarisiyyen “Ma uŕa d kenniw *ɛawed* tweddarem? ⁴⁸Ma xenni din ca n iijen zeg imeqqranen *n weydud* niɣ zeg Ifarisiyyen yumen zzayes? ⁴⁹Maca řyaci-ya i war issinen ca ttawrat, aqqa itwan ϵ eŕ.” ⁵⁰Nikudimus wenni ɣares iruħen s ġiŕet, netta d iijen zzaysen, inna asen ⁵¹“Ma ad teħkem ttawrat nney x ij n bna dem, nnebŕa mma ad zzayes tseŕ uca ad tessin min ittegg netta?” ⁵²Arrin-d, nnan as “Ma uŕa d cek attay zi Ljalil? Arzu, xzar, uŕa d ijj n umkacaf war d ikki ca zi Ljalil.” ⁵³Xenni iruħ kuŕ iijen ɣar taddart nnes.

Tamyart izennan

8 ¹Maca Yeccu iruħ ɣar wedrar n Zzitun. ²Yar ŝŝbeħ zic yusi-d *ɛawed* ɣar taddart iqeddsen, usin-d ɣares iwdan marra uca am iqqim, ibda issiŕmad iten. ³Imseŕmaden n idlisen d Ifarisiyyen iwyen as-d ict n temyart, tetwaŕtef tettegg zzina. Ssbedden tt di řweŝt, ⁴nnan as “A Amseŕmad, tamyart-a tetwaŕtef tettegg zzina. ⁵Iweŝŝa aney Musa di ttawrat ad narjem *timyarin* amecnaw tanita. Maca min i ɣa tinid cek?” ⁶Nnan as man aya ħima ad t jarrben, ħima ad ɣarsen tiŕi minzi xas i ɣa cetcan. Maca Yeccu yuďar swadday, yura s uďaď nnes di tmurt. ⁷Řami qqimen ammu ttesseqsan, ibedd, inna asen “Wi zzaywem iġan nnebŕa ddnu b, ad xas inďar azru amezwaru.” ⁸Xenni yuďar *ɛawed* swadday uca yura di tmurt. ⁹Řami sŕin man aya, ffyen iijen awarni wennedni, imeqqranen d amezwaru, xenni ineggura. Iqqim Yeccu weħdes ak-d temyart tbedd di řweŝt. ¹⁰Yeccu, umi ikkar, war izri ħed myir tamyart, inna as “A tamyart, mani iġan inni cem iďeŕmen? Ma war cem iħakem uŕa d iijen?” ¹¹Nettat tenna “Uŕa d ijj, a Sidi.” Yeccu inna as “Uŕa d necc war cem tħakamey ca, ruħ, war tteawad ad tegged ddnu b.”

Yeccu d tifawt n ddunnit

¹²Řexdenni issiweŕ Yeccu *ɛawed* akidsen, inna “Nec d tifawt n ddunnit. Wenni d ayi i ɣa iďfaren, war iggur *ɛemmarŝ* di taġeŝt,

maca ad yares tiři tfawt n tudart.”¹³Nnan as Ifarisiyyen “Cek tcehhded x yixef nnek, chadet nnek war teġi ca d tidett.”¹⁴Yeccu yarr-d, inna asen “Mařa necc ceħdey x yixef inu, waxxa amenni chadet inu teġa d tidett, minzi necc ssney manis d usiğ u mani i ya raħey, maca kenniw war tessinem ca manis d usiğ uřa mani i ya raħey.”¹⁵Kenniw tħakamem eħařsab aysum, necc war tħakamey uřa x ijjen.¹⁶U necc, mařa ħakmey, ad yiři řeħkam inu d tidett, minzi necc war ġiğ bu weħdi, maca necc d Tbabat wenni d ayi-d issekken.¹⁷Tura eawed di ttawrat nwem belli chadet n tnayen n iwdan d tidett.¹⁸Necc d wenni icehhden x yixef inu uca uřa d Tababat wenni d ayi-d issekken, iched xafi.”¹⁹Nitni nnan as “Mani iġa Babac?” Yeccu yarr-d “Kenniw war d ayi tessinem ca u war tessinem Baba. Maelik kenniw d ayi tessnem ad tiři tessnem uřa d Baba.”²⁰Inna awařen-a di mani tuya řşenduq n řşedqet, am tuya isseřmad di taddart iqeddsen.

War t iřtif uřa d ijj minzi tasaeet nnes tuya ead war d tiwiđ.²¹Xenni Yeccu inna asen eawed “Necc ad raħey, kenniw ad xafi tarzum, ad temmtem di ddnub nwem. Mani i ya raħey necc, war tzemmarem kenniw ad d tasem.”²²Udayen nnan “Ma ad iney ixef nnes, minzi netta inna ‘Mani i ya raħey necc, war tzemmarem kenniw ad d tasem?’”²³Netta inna asen “Kenniw zi swadday, necc zi sennej. Kenniw zi ddunnit-a, maca necc war ġiğ ca zi ddunnit-a.”²⁴X uyenni nniğ awem ‘Ad temmtem di ddnub nwem’. Řami kenniw war tuminem ca aqqa d necc, ad temmtem di ddnub nwem.”²⁵Nnan as “Min teenid cek?” Yeccu inna asen “Necc d min d awem nniğ zeg umezwaru.”²⁶Necc ħari ařtas n tmesřayin i xef zemmarey ad xawem ssiwřey uca ad xawem ħekmey. Maca wenni d ayi-d issekken aqqa-t d tidett. Uca min zzayes sřiğ necc, ad t iniğ i ddunnit.”

²⁷Nitni war fhimen ca, belli tuya issawař akisen x Tbabat.²⁸Xenni inna asen Yeccu “Xmi i ya tessgaeddem Mmis n bñadem, ad tfehmem belli aqqa-t d necc u belli necc war ttegeğey uřa d ict n řħajet zeg yixef inu, maca necc ssawařey am mammec d ayi isseřmed Tbabat.”²⁹Wenni d ayi-d issekken aqqa-t akidi. Tababat war d ayi iji ca weħdi, minzi necc ttegeğey řebda min t yarıđan.”³⁰Umi tuya issawař x tmesřayin-a, umnen dayes ařtas.

Ayt n Ibrahim

³¹Inna Yeccu i Wudayen inni dayes yumnen “Mařa teqqimem tetteffem deg wawař inu, ad tiřim s tidett d imeħđaren inu ³²uca ad tessnem tidett uca tidett ad kenniw tħarr.” ³³Arrin-d xas “Neccin d ayt n Ibrahim, emmarř war neebid ħed. Mammec tzemmed ad tinid ‘kenniw ad twaħarrem?’” ³⁴Yeccu yarr-d xasen “S tidett, s tidett, ad awem iniy, marra wenni itteggem ddnub netta d ismey n ddnub ³⁵uca ismey war ittyimi ca di taddart řebda, maca mmis ad din iqqim i řebda. ³⁶Xmi kenniw i ya iħarr Tmemmit, ad tiřim s tidett d iħurriyyen. ³⁷Necc ssney, aqqa kenniw d ayt n Ibrahim, maca kenniw tarezzum ad ayi tenyem, minzi awař inu war yufi ca amcan daywem. ³⁸Necc ssawařey s min zriř zi Baba. Uřa d kenniw tetteggem zi min teźrim zi řejdud nwem.” ³⁹Arrin-d, nnan as “Babatney d Ibrahim.” Inna asen Yeccu “Maelik kenniw teřim zi ayt n Ibrahim ad yiři aqqa tetteggem řexdayem n Ibrahim. ⁴⁰Maca řexxu tarezzum ad ayi tenyem, necc d ij n bnađem i tuya akidwem issawařen s tidett i sřiř zi Arebbi. Man aya war t iggi ca Ibrahim. ⁴¹Kenniw tetteggem řexdayem n babatwem.” Xenni nnan as nitni “Neccin war d nexřiř ca zi zzina, aqqa řarney ijjen wenni d Babatney, aqqa-t d Arebbi.”

Ayt n ibřiis

⁴²Inna asen Yeccu “Maelik Arebbi d Babatwem, iři aqqa texsem ayi, minzi necc ffey-d zi Arebbi uca usiy-d zzayas. War d usiy ca zeg yixef inu, maca netta issekk ayi-d. ⁴³Mayemmi war tefhimem i wawařen inu? Minzi kenniw war tzemmarem ad tesřem i wawař inu. ⁴⁴Aqqa řarwem ibřiis d tababat uca texsem ad teggem immezran n babatwem. Netta tuya ineqq iwdan zeg umezwaru u war ibedd di tidett minzi war dayes bu tidett. Meřmi mma issiweř s uxarriř, issawař s min dayes, minzi netta d bu-ixarriřen d tababat n uxarriř. ⁴⁵Maca, umi necc qqarey awem tidett, kenniw war dayi tettimnem ca. ⁴⁶Wi zzaywem ad ayi isseqneē x ddnub? Umi qqarey tidett, mayemmi war dayi tettimnem ca? ⁴⁷Wenni iřan zi Arebbi, ittesřa i wawařen n Arebbi. Minzi kenniw war teřim ca zi Arebbi, s uyenni kenniw war tettesřim ca.”

Yeccu tuya-t din qbeř Ibrahim

⁴⁸Udayen arrin-d, nnan as “Ma war iġi nican umi nenna, aqqa cek d Asamari u dayek cciġan.” ⁴⁹Yeccu yarr-d “Necc war dayi bu cciġan, maca necc ttwegqarey Baba uca kenniw tessetqaram ayi. ⁵⁰Necc war arezzuq ca aeuġi inu. Aqqa din ijjen i xas yarezzun u ijjen i ęa iħkem. ⁵¹S tidett, s tidett, ad awem iniy, mařa ca n yijjen iħtef deg wawař inu, emmarř ad ięar řmewt i řabda.” ⁵²Nnan as Wudayen “Řexxu nessen belli dayek cciġan. Aqqa Ibrahim d imkacafen mmuten. Cek teqqared ‘mařa ca n yijjen iħtef deg wawař inu, emmarř ad iqqas řmewt i řabda’. ⁵³Ma cek temyared x jedditney Ibrahim wenni immuten? Uřa d imkacafen mmuten. Min tħesbed ixef nnek?” ⁵⁴Yarr-d Yeccu “Mařa necc sseuġiy ixef inu, aeuġi inu war iġi d walu. Baba, aqqa isseuġa ayi, wenni minxef teqqarem, aqqa-t d Arebbi nney. ⁵⁵Kenniw war t tessinem, maca necc aqqa ssney t. Mařa nniy ‘war t ssiney’, ad iřiy necc d bu-ixarriqen am kenniw. Maca necc ssney t uca tteħtefey deg wawař nnes. ⁵⁶Jedditwem Ibrahim tuya ittraja s řefraħet ħima ad ięar ass inu uca ięra it, uca ifarħ.” ⁵⁷Nnan as Wudayen “Ead war ęarek bu xemsin iseggwusa, mammec teggid teęrid Ibrahim?” ⁵⁸Inna asen Yeccu “S tidett, s tidett, ad awem iniy, qbeř mma tuya Ibrahim, tuya necc ġiy.” ⁵⁹Xenni ksin ięra ħima ad t arejmen, maca Yeccu issnuffar ixef nnes uca iffey zi taddart iqeddsen, icuqq di řwest nsen, ammu i xasen ikka.

Asgenfi n ij n udaryař zi temzi nnes

9 ¹Umi xasen-d ikka, ięra ijj n weryaz tuya d adaryař zeg wami d ixreq. ²Imeħdaren nnes sseqsan t, nnan “A Amseřmad, wi ixđan, ma d wa niy lwalidin nnes ařami d ixreq d adaryař?” ³Yeccu yarr-d “Uřa d netta war ixđi uřa d lwalidin nnes, maca man aya aqqa imsar, ħima ad dayes đharent řexdayem n Arebbi. ⁴Icuwwar ad xedmey řexdayem n wenni d ayi-d issekken, maħend ead d aziř. Ad d tas taęest mani war izemmar uřa d ijj ad ixdem. ⁵Mintra necc aqqa-yi di ddunnit, necc d tifawt n ddunnit.” ⁶Řami inna ammu, issusef di tmurt, igga abeęaę zeg ikuffan nni uca iħennec tiħtawin n udaryař s ubeęaę. ⁷Inna as “Ruħ, tessirded deg uęeřmam n Siluwam”, isem-a ixs ad yini ‘itwassekken’. Iruħ, issird, idweř ittwařa.

⁸Jjiran d yinni tuya t iżrin qbeř ssnen aqqa-t d adaryar, nnan “Ma war ięi d wa d wenni tuya ittyiman ittettar?” ⁹Ca zwaysen nnan “Aqqa d netta.” Nnan innedni “Ittawi-d dayes”. Maca netta inna “Aqqa d necc.” ¹⁰Nnan as “Mammec ggin tt twarezment tiřřawin nnek?” ¹¹Yarr-d uca inna “Bnadem nni umi qqaren Yeccu, igga abeęae, ięhennec tiřřawin inu uca inna ayi ‘Ruę ęar ugeřmam n Siluwam, tessirded’. Xenni ruęey, ssirdey uca dewřey ttwarıy.” ¹²Nnan as “Mani ięa netta?” Inna “War ssiney.”

¹³Awyen-d wenni tuya ięa qbeř d adaryar ęar Ifarisiyyen. ¹⁴Tuya d ssebt řami igga Yeccu abeęae u yarzem as tiřřawin nnes. ¹⁵Sseqsan t Ifarisiyyen eawed, mammec idweř ittwařa. Yarr-d xasen “Igga abeęae x tiřřawin inu, xenni ssirdey uca dewřey ttwarıy.” ¹⁶Ca zeg Ifarisiyyen nnan “Bnadem-a war ięi ca zi Arebbi, minzi netta war ittweqqar ca ssebt”. Ca nnedni nnan “Mammec izemmar ij n bnadem d aeęffan ad igg řeęřamat am tina?” Uca imsar ubeřřu jarasen. ¹⁷Nnan eawed i udaryar “Min xas teqqared cek, ařami yarzem tiřřawin nnek?” Netta inna “Aqqa-t d amkacaf.” ¹⁸Udayen war zzayes uminen ca belli netta tuya d adaryar uca idweř ittwařa, ařami d řayan x lwalidin n wenni idewřen ittwařa. ¹⁹Sseqsan ten, nnan “Ma wa d mmitwem minxef teqqarem aqqa itwaxřeq-d d adaryar? I mammec igga ittwařa řexxu?” ²⁰Arrin-d lwalidin nnes uca nnan “Neccin nessen belli wa d mmitney, aqqa itwaxřeq-d d adaryar.” ²¹Maca mammec igga ittwařa řexxu, war nessen u wi d as yarezmen tiřřawin nnes war t nessen ca. Seqsam t simant nnes, netta aqqa d abřıy, ad issiweř x yixef nnes.” ²²Nnan lwalidin nnes ammu minzi ggweden zeg Wudayen, minzi Udayen meahaden belli wenni i ęa icehden aqqa netta d Lmasię ad itwassuffey zeg usinagug. ²³X uyenni nnan lwalidin nnes “Netta aqqa-t d abřıy, seqsam t s yixef nnes.” ²⁴Řayan-d tawařa wiss tnayen x weryaz wenni tuya d adaryar, nnan as “Seuęa Arebbi! Aqqa nessen belli aryaz-a d ij n umednub.” ²⁵Netta yarr-d “Ma netta d amednub war ssiney, necc ssney ict n tmesřact, aqqa tuya-yi d adaryar, řexxu ttwarıy.” ²⁶Nnan as “Min zzayek igga? Mammec d ac igga yarzem tiřřawin nnek?” ²⁷Yarr-d xasen “Aqqa nniy awem t, kenniw war tesřim. Mayemmi texsem ad t tesřem i twařa nnedni? Ma texsem uřa d kenniw ad dewřen d imeęđaren nnes?” ²⁸Kkwaren t, nnan “Cek d ameęđar

nes! Maca neccin aqqa d imehđaren n Musa. ²⁹Neccin nessen aqqa Arebbi issiweř ak-d Musa, maca wanita war nessin ca manis netta.” ³⁰Yarr-d weryaz, inna asen “Aqqa di man aya řeejeb, kenniw war tessinem ca manis netta, waxxa amenni netta yarzem ayi tiřřawin inu. ³¹Neccin nessen, aqqa Arebbi war ittesři ca řar imednab, maca mařa ca n ijjen ittweqqar Arebbi ad igg min ixš netta, aqqa *Arebbi* ad řares iseř. ³²Emmarř war itwasři qae, aqqa ca n ijjen yarzem tiřřawin n ijjen ixřeq-d d adaryarř. ³³Mařa wa war iři ca zi Arebbi, war izemmar ad igg walu!” ³⁴Arrin-d, nnan as “Cek txeřqed-d tkemmřed di ddnuh, ma xenni tesseřmaded aneyř?” Xenni nđaren t řar barra.

³⁵Isřa Yeccu belli nđaren t řar barra, uca, umi t yufa, inna as “Ma tumned zi Mmis n Arebbi?” ³⁶Yarr-d, inna “Min iena netta, a Sidi, řima ad dayes amneyř?” ³⁷Inna as Yeccu “Aqqa cek teřrid t uřa d wenni akic issawařen aqqa-t d netta.” ³⁸Netta inna “Umney, a Sidi” uca ieebd as. ³⁹Yeccu inna “I řřukm i řar d usiy řar ddunnit-a, řima ad řaren inni war ittwiřin u řima inni ittwařan ad daryřen.” ⁴⁰Umi sřin ca n Ifarisiyyen i iřřan akis man aya, nnan as “Ma aqqa d neccin eawed d idaryarřen?” ⁴¹Inna asen Yeccu “Maelik teřgam d idaryarřen war řarwem ittiři bu ddnuh, maca řexxu teqqarem ‘aqqa nettwařa’, x uyenni ad iqqim ddnuh nwem.”

Yeccu d ameksa d ařebřan

10 ¹S tidett, s tidett ad awem iniř, wenni war ittidfen zi tewwart řar wexxam n wuři, maca ad issgaeeed manis nneđni, aqqa-t d aceffar d axewwan. ²Maca wenni i řa yadfen zi tewwart netta d ameksa n wuři. ³Aeessas n tewwart ad as yarzem i wanita uca uři ad iseř i tmijja nnes. Netta ad iřaya i wuři nnes s ismawen nsen uca ad ten issuffey řar barra. ⁴Awarni řami issuffey marra uři nnes, ad yuyur zzatsen uca uři ad t-id idřar minzi issen tmijja nnes. ⁵Maca abarrani war t đeffaren emmarř, maca ad zzayes arewřen, minzi nitni war ssinen tmijja n ubarrani.” ⁶Inna asen Yeccu amettiř-a, maca nitni war fhimen ca i tmesřayin min xef tuřa akisen issawař. ⁷Yeccu inna eawed “S tidett, s tidett ad awem iniř, necc d tawwart n wuři. ⁸Marra inni i d yusin qbeř inu aqqa-ten d iceffaren d ixewwanen. Maca uři war d asen isři. ⁹Necc d

tawwart. Wenni zzayi i ɣa yadfen, ad itwassenjem. Netta ad yadef, ad iffey uca ad yaf mani i ɣa yarwes.¹⁰ Aceffar war d ittis myir ɣima ad yacar, ad iɣarɣ uɣa ɣima ad isshellek. Necc maca usiy-d ɣima ad ɣarsen tiɣi tudart s waɣtas.¹¹ Necc d ameksa d aɣebɣan. Ameksa d aɣebɣan issrusa tudart nnes i wuɣi nnes.¹² Maca amcaray aqqa netta war iɣi ca d ameksa u netta war iɣi ca d bab n wuɣi. X minni i ɣa iɣar uccen yusi-d, ad yejj uɣi uca ad yarweɣ. Uccen ad ten ixɣef uca ad izeɣee uɣi.¹³ Amcaray yarweɣ minzi netta d amcaray, war t icqi wuɣi.¹⁴ Necc d ameksa d aɣebɣan. Ssney uɣi inu uca uɣi inu issen ayi,¹⁵ am mammec i d ayi issen Tbabat, ammu i ssney necc Tababat. Necc wciɣ tudart inu i wuɣi inu.¹⁶ Yari ead uɣi nneɣni, inni war iɣin ca zeg wexxam-a. Icuwwar ayi ad ten-d nedhey tanya uca ad sɣen i tmijja inu, xenni ad tiɣi d ict n tɣimart d ijj n umeksa.¹⁷ S man aya ittexas ayi Tbabat, minzi necc wciɣ tudart inu ɣima ad tt-id ksiɣ eawed.¹⁸ Uɣa d ijj war zzayi tt iksi, maca necc wciɣ tt s yixef inu. Yari ɣɣulɣa ɣima ad tt wceɣ u ɣari tizemmar ad tt-id ksiɣ eawed. Tawɣeyyet-a tɣfey tt zi Baba.”¹⁹ Xenni imsar eawed ij n ubeɣtu jar Wudayen s ssibbet n wawaɣen-a.²⁰ Aɣtas zzaaysen nnan “Aqqa dayes ccitan, netta d abuhaɣi, mayemmi ɣares tettesɣam?”²¹ Inneɣni nnan “Awaɣen-a war ɣin ca n ij n umaryaɣ. Ma izemmar ccitan eawed ad yarzem tiɣawin n idaryaɣen?”

Udayen arezzun ad nyen Yeccu

²² Yiweɣ-d ɣeid n ureqqee d weɣdaɣ n taddart iqeddsen di Urcalim. Tuɣa d ɣmecta.²³ Yeccu iggur di taddart iqeddsen deg ukulwar s ibilaren n Sulayman.²⁴ Nnɣen as-d Wudayen, nnan as “Aɣ meɣmi d aneɣ i ɣa tejjed nuyer? Maɣa cek d Lmasiɣ, ini aneɣ t s bɣayɣay.”²⁵ Yarr-d xasen Yeccu “Nniɣ awem t uca kenniw war tuminem. ɣexdayem i gɣiɣ s yisem n Baba, cehhdent xafi.²⁶ Maca kenniw war tuminem minzi kenniw war teɣim ca d uɣi inu, am mammec tuɣa d awem nniɣ.²⁷ Uɣi inu isɣa ɣar tmijja inu u necc ssney ten uca nitni ad ayi-d ɣfaren.²⁸ Ad asen wceɣ tudart n ɣebda uca war ttwahellken ɣemmarɣ qaɣ uca uɣa d ijj war ten ixetɣef zeg ufus inu.²⁹ Baba wenni d ayi ten iwcin, aqqa-t d ameqqran x kuɣci. Uɣa d ijj war izemmar ad ten ixɣef zeg ufus n Baba.³⁰ Necc d Baba d ijjen.”³¹ Xenni ksin Wudayen eawed iɣra ɣima ad t arejmen.³² Yeccu yarr-d xasen “Aqqa ssecney awem aɣtas

n řexdayem d tişebħanin zi Baba. I man řxedmet zzaysent i texsem ad ayi tarejmem?”³³ Arrin-d xas Wudayen, nnan “War cek narejjem x ict n řxedmet d taşebħant, maca umi tekfared u tarrid ixef nnek d Arebbi, waxxa cek d bñadem i teġid.”³⁴ Yeccu yarr-d xasen “Ma war turi di ttawrat nwem ‘Necç nniy, aqqa kenniw d irebbiten’?”³⁵ Mařa netta isemma ten ‘irebbiten’ i yinni umi d yusa wawař n Arebbi uca war izemmar ad itwayarz wedlis,³⁶ mammec teqqarem kenniw x wenni itwaqeddsen zi Tbabat u x wenni issekk it-id ġar ddunnit ‘Aqqa cek tekfared!’, minzi necç nniy ‘Aqqa necç d Mmis n Arebbi’?”³⁷ Mařa necç war xedmey ca řexdayem n Baba, xenni war dayi ttannem ca.³⁸ Mařa xedmey tent, uca kenniw ead war dayi tuminem, amnem xenni di řexdayem ħima ad tessnem aqqa Tababat dayi u necç aqqa-yi dayes.”³⁹ Arezzun ad t tfffen eawed, ixtutter asen jar ifassen nsen.⁴⁰ Iraħ eawed ġar ujemmađ n yeyzar n Lurdun ġar wemcan mani tuġa issyettaş Yuħanna deg umezwaru uca iqqim dinni.⁴¹ Usin-d ġares wařtas n *iwdan*, nnan “Yuħanna war iggi uřa d ict n řeřramet, maca marra min inna x wanita d tidett.”⁴² Uca umnen dayes ařtas diha.

Asnekkar n Alięazar zi řmewt

11 ¹Tuġa din ij n bñadem ihřec, qqaren as Alięazar, netta zi Bayteanya zi dcar n Maryem d wečmas Marta. ²Maryem xenni, nettat d tenni i tuġa idehħnen Sidi s řefwaħet n mirru uca tmesseħ iđaren nnes s ucuwwaf nnes, aqqa umas Alięazar tuġa ihřec. ³Ssekkent-id twečmatin ġares, nnant “A Sidi, xzar, wenni tersed, aqqa ihřec.” ⁴Řami isřa Yeccu man aya, inna “Řehřac-a war iġi ca i řmewt, maca i ueuġi n Arebbi, ħima ad zzayes itwasseuġ Mmis n Arebbi.” ⁵Tuġa Yeccu ittexs Marta d wučmas d Alięazar.

⁶Ařami isřa, aqqa *Alięazar* ihřec, řexdenni iqqim ead tnayen n wussan deg wemcan mani t tuġa. ⁷Awarni man aya inna i imeħđaren “Ejj aney ad nraħ eawed ġar tmurt n Yahudiyya.” ⁸Imeħđaren nnan as “A Amseřmad, drus zeg wami tuġa Udayen arezzun ad cek arejmen, waxxa amenni, ma cek ad traħed dinni eawed?” ⁹Yarr-d Yeccu “Ma war iġi deg uziř teneac n tsaęetin? Mařa ca n yijjen yuyur s uziř, war ittneqriđ ca, minzi ittwařa tifawt n ddunnit-a.¹⁰ Mařa ca n yijjen ad yuyur s ġiřet, ad inqaređ, minzi war dayes bu tfawt.”¹¹ Awarni řami inna man aya, inna asen “Alięazar, ameddukeř

nney aqqa itteṭṭeš, maca ad raḥey ḥima ad t-id ssnekkarey.”¹²Nnan as imeḥḍaren “A Sidi, maṛa netta itṭeš, xenni ad iggenfa!”¹³Maca Yeccu tuḡa issawaṛ x řmewt nnes, maca ittyiř asen belli netta issawaṛ x arraḥet n yiḍeš.¹⁴Xenni inna asen Yeccu s bṭayṭay “Aqqa Alicazar immut.¹⁵U necc farḥey awem umi necc war din ġiḡ, ḥima ad tamnem. Maca jjem aney ad ḡares nraḥ.”¹⁶Xenni inna Tuma, wenni umi qqaren ‘Acniw’, i imeḥḍaren imeacaren nnes “Ejj aney ad nraḥ uṛa d neccin ḥima ad nemmet akides.”

¹⁷Řami d yusa Yeccu, yufa aqqa edun arebca n wussan zeg wami tuḡa-t deg wenḍeř.¹⁸Bayteanya tuḡa tudes Urcalim eřaḥař xemstac n ‘istadiyyen’ (=eřaḥař trāta n kilumiter)¹⁹Aṭṭas n Wudayen usin-d ḡar Marta d Maryem ḥima ad tent eezzan x umatsent.²⁰Řami teřa Marta, aqqa Yeccu yiweḍ-d, teffey ḥima ad t teřqa, maca Maryem teqqim di taddart.²¹Tenna Marta i Yeccu “A Sidi, maelik cek tuḡa da, iři war ittmetti ca uma.²²Maca řexxu ead ssney eawed belli marra min i ḡa tettared zi Arebbi, Arebbi ad ac t iwc.”²³Yeccu inna as “Ad d ikkar umam.”²⁴Tenna as Marta “Ssney belli ad d ikkar di tnukra deg wass aneggaru.”²⁵Yeccu inna as “Nec d tanukra d tudart. Wenni zzayi i ḡa yammen, ad iddar, waxxa immut,²⁶u marra wenni iddaren uca yumen zzayi, war ittmetti i řebda. Ma tettammed s man aya?”²⁷Tenna as “Wah, a Sidi, umney aqqa cek d Lmasiḥ, Mmis n Arebbi wenni tuḡa i d ttasen ḡar ddunnit.”

²⁸Řami tenna aya, truḥ trāḡa i wečmas Maryem s řḥess, tenna “Amseřmad aqqa-t danita, ittṛāḡa-d xam.”²⁹Řami teřa aya, tekkar s tazzřa, tusi-d ḡares.³⁰Tuḡa Yeccu war d yusi ca ead ḡar dcar, maca tuḡa-t deg wemcan mani t teřqa Marta.³¹Udayen inni iḡan akides di taddart u tuḡa ttēezzan tt, řami řrin Maryem tekkar s tazzřa, teffey, ḍfaren tt xenni, qqaren ‘Aqqa truḥ ḡar wenḍeř ḥima ad tru dinni’.

³²Řami d tusa Maryem ḡar mani tuḡa Yeccu uca teźri t, tewḍa ḡar iḍaren nnes, tenna as “A Sidi, maelik cek tuḡa danita, iři uma war ittmetti ca.”³³Řami tt izra Yeccu tetru d Wudayen inni i d yusin akides ttrun, innehweř arruḥ nnes, inhezz³⁴uca inna “Mani t tessarsem?” Nnan as “Araḥ-d, a Sidi, ad texzared.”³⁵Yeccu iru.³⁶Udayen nnan “Xzarem mečař t ittexs.”³⁷Maca ca zzaaysen nnan “Ma war izemmar wa, wenni yarezmen tiṭṭawin i udaryař, maḥend uṛa d wanita war ittmetti ca?”

³⁸Innehweř Yeccu ɛawed deg yixef nnes uca yusi-d ɣar wendeř, aqqa-t d ij n ifri uca ict n teřdart tuya temmars xas. ³⁹Yeccu inna “Ksim tařdart.” Tenna as Marta, ućmas n wenni immuten, “A Sidi, aqqa yarřuđ minzi teėdu xas arebea n wussan.” ⁴⁰Inna as Yeccu “Ma war d am nniy, mařa tumned ad tžared aeuđi n Arebbi?” ⁴¹Kksin tařdart mani tuya yarsa wenni immuten. Xenni issgæeed Yeccu tiřawin nnes ɣar sennej uca inna “A Tababat, ɛafak řami d ayi tesřid. ⁴²Necc ssney aqqa řebda tettesřid ɣari, maca di řřwee n řřaci i d ayi-d innden, nniy t, řima ad amnen belli cek tessekkeed ayi-d.” ⁴³Řami inna aya, iřaya s jjeħd “Aliɛazar, ffey-d!” ⁴⁴Řexdenni iffey-d umettin, tuya ifassen d idaren nnes carfen s řecfen uca tuya ij umendiř x uyembub nnes. Inna asen Yeccu “Fesyem as-d. Jjem t ad iřař.”

Udayen arezzun ad nyen Yeccu

Mat. 26:1-5; Mar. 14:1-2; Luk. 22:1-2

⁴⁵Ařtas n Wudayen inni d yusin ɣar Maryem uca zřin min igga, umnen zzayes. ⁴⁶Maca ca zzaysen ruřen ɣar Ifarisiyyen, nnan asen min igga Yeccu. ⁴⁷Xenni ggin arruyas n ikehhanen d Ifarisiyyen ij n umuni n lmeħkama tameqqrant n Wudayen *umi qqaren Sunhidrin*, nnan “Min i ɣa negg? Aryaz-a ittegg ařtas n řečřamat. ⁴⁸Mařa nejj it amya, marra ad zzayes amnen, ad d asen Irumaniyyen, ad kksen amcan nney uřa d *iwdan n řgens nney*.” ⁴⁹Inna asen ijjen zzaysen, aqqa-t d Qayafa, netta d azeđif n ikehhanen deg useggwas nni “Kenniw war tessinem walu ⁵⁰uca war tefhimem ca belli ineffe i neccin x minni i ɣa immet ijj n bnađem di řřwee n weydud uca war ittmetti ca řgens nney marra.” ⁵¹War ini ca man aya zeg yixef nnes, maca, am t tuya d azeđif n ikehhanen deg useggwas nni, tuya ittkacaf belli Yeccu ad immet di řřwee n řgens. ⁵²War iđi řaca di řřwee n řgens nnes, maca uřa řima ad issmun ɣar ijjen tarwa n Arebbi i itwazeđeen. ⁵³Zeg was nni mcawaren xenni řima ad t nyen. ⁵⁴S uyenni Yeccu war iqqim iggur jar Wudayen s břayřay, maca iruř ssenni ɣar ict n tmurt tudes řexřa, ɣar ict n tendint qqaren as Ifrayim uca iqqim dinni ak-d imeħđaren nnes. ⁵⁵Tuya ‘Basxa’, řeid n Wudayen, eřayen yiweđ-d. Ařtas zi tmurt usin-d ɣar Urcalim řima ad řehharen ixef nsen qbeř řeid n Basxa, ⁵⁶Nitni tuya arezzun x Yeccu uca nnan jarasen umi nitni bedden di taddart iqeddsen “Min tettwařam? Ma war d ittis

yar řeid?"⁵⁷ Arruyas n ikehhanen d Ifarisiyyen weřřan belli mařa ca n yijjen issen mani ięa, ad t ini, ĥima ad t tťfen.

Adhan s řeętur iyřan di Bayteanya

Mat. 26:6-13; Mar. 14:3-9

12 ¹Setta n wussan qbeř řeid n Basxa, yusi-d Yeccu yar Bayteanya, mani tuya ięa Alieazar wenni d issnekkar Yeccu zeg imettinen. ²Uca ggin as din ij n umensi u Marta tuya tsexxar. Alieazar tuya d ijjen zeg yinni tuya iqqimen akides yar tťabřa. ³Teksi-d Maryem ij n ardeř n řefwařet n řřenbel teřfa tiyřa, tedhen idaren n Yeccu, xenni temseř idaren nnes s ucuwraf nnes. Taddart teccur s řefwařet n mirru. ⁴Ijjen zeg imeřdaren nnes wenni umi qqaren Yahuda Simean Isxariyuři wenni t i ya isellmen, inna ⁵"Mayemmi war temmenz ca řefwařet-a n mirru s teřt meyya n ddinar, ĥima ad temmewc i imezřađ?" ⁶Netta inna aya, war ięi minzi cęan t imezřađ, maca minzi netta d aceffar, tuya yares řřenduq uca ittekkes zi min dayes immarsen. ⁷Yeccu inna "Jjem tt, aqqa txemmeř itt i wass n wendeř inu. ⁸Minzi imezřađ aqqa-ten řebda akidwem, maca necc war kidwem ģiy i řebda." ⁹Ařtas n řyaci n Wudayen ssnen belli netta aqqa-t dinni uca usin-d, war ięi ĥaca zi ssibbet n Yeccu, maca eawed ĥima ad zaren Alieazar wenni d issnekkar zeg imettinen. ¹⁰Mcawaren arruyas n ikehhanen ĥima ad nyen uřa d Alieazar, ¹¹minzi ařtas n Wudayen usin-d zi ssibbet nnes uca umnen di Yeccu.

Adaf n Yeccu yar Urcalim

Mat. 21:1-11; Mar. 11:1-11; Luk. 19:28-40

¹²Tiwecca nnes, umi sřin ařtas n řyaci inni d yusin yar řeid belli Yeccu ad d yas yar Urcalim, ¹³ksin ifetwan n tini uca ffęen ĥima ad t řęan, řayan ...

*"Uřanna, d amimun wenni i d yusin s yisem n Arebbi,
aqqa-t d ajeęid n Israyil." Sbh. 118:25-26*

¹⁴Yufa Yeccu ij n wesnus uca inya xas, am mammec tura

*¹⁵"War tteggwed ca, a tayeęit n Siyun, xzar,
ajeęid nnem ad d yas, iqqim x wesnus n teyyuĉ." Zak. 9:9*

¹⁶Imeħħdaren nnes war fhimen ca timesřayin-a deg umezwaru. Maca awarni řami itwassuēřa Yeccu, řexdenni eeqřen belli man aya tura xas uca belli nitni ggin zzayes man aya. ¹⁷Řyaci i tuya iğan akides, umi iřaya x Alicazar zeg wenĊeř, tuya iched aqqa netta issnekkar it-id zeg imettinen. ¹⁸S man aya iřqa t-id řyaci minzi nitni sřin belli igga řeēřamet-a. ¹⁹Ifarisiyyen xenni nnan jarasen “Tettwařam mliħ belli kenniw tettakkwaĊem řar walu, xzarem, aqqa qaē ddunnit teĊfar it-id.”

Yeccu izwar issiweř x řmewt nnes

²⁰Tuya din ca n Iyuniyyen jarasen, inni d yusin ħima ad eebden di řeid. ²¹Ina ruħen řar Filibbus, wenni zi *tendint n* Baytřayda di Ljalil, sseqsan t, nnan “A Sidi, nexs ad nřar Yeccu.” ²²Yusi-d Filibbus, inna *tt* i Andrawus, Andrawus d Filibbus eawed nnan *tt* i Yeccu. ²³Maca Yeccu yarr-d xasen, inna “Aqqa tiweĊ-đ tsaeēet i di i řa itwassuēğ Mmis n bnađem. ²⁴S tidett, s tidett, ad awem iniy, mařa war iwĊi řħebb n yirden di tmurt uca ad immet, xenni ad iqqim weħdes, maca mařa immut, xenni ad d tawyi řyiğet ařas. ²⁵Wenni ittexsen tudart nnes, ad *tt* ixsar u wenni i řa icarhen tudart nnes di ddunnit-a, ad *tt* ixemmeř i tudart n řebda. ²⁶Mařa ca n yijjen isexxar ayi, ejj it ad ayi iĊfar. Mani i řa iřiy necc, dinni i řa yiři eawed umsexxar inu. Mařa ca n iijen ixđem ayi, ad t icenneē Tbatat. ²⁷Řexxu uř inu innehweř, min i řa iniy? A Tababat, senjem ayi zi tsaeēet-a? Maca x uyenni i d usiy řar tsaeēet-a. ²⁸A Tababat, seuği isem nnek.” Xenni tusi-d ict n tmijja zeg ujenna “Sseuğey t uca ad t sseuğey eawed.” ²⁹Řyaci i tuya ibedden din isřa t uca inna “Aqqa imsar wajja”. InneĊni nnan “Aqqa issiweř-đ řares ij n lmalak”. ³⁰Yarr-d Yeccu, inna “Tmijja-ya war teği ca di řtweē inu maca di řtweē nwem. ³¹Řexxu ad yiři řħukm x ddunnit-a. Řexxu ad immenĊar umeqqran n ddunnit-a řar barra. ³²U necc, x minni i řa twassgaēēdey zi tmurt, ad řari-d jebdey marra.” ³³Inna man aya ħima ad isscen řar man řmewt i řa immet. ³⁴Řyaci yarr-d xas “Neccin nesřa zi ttawrat belli aqqa Lmasiħ ad iqqim i řebda. I mammec teqqared cek belli ittxeřsa i Mmis n bnađem ad itwassgaēēed? Min iēna Mmis n bnađem?” ³⁵Yeccu inna asen “Tifawt ad tiři akidwem drus n řweqt ead. Uyurem, řami ead řarwem tifawt, ħima war kenniw teřtef tağest. Wenni igguren di tağest, war issin mani iggur. ³⁶Amnem di tfawt maħend nettat ead aqqa-tt řarwem,

ħima kenniw ad tiřim tarwa n tfawt.” Ammu i tuęa issawař Yeccu, řexdenni yuyur uca innufar zzaysen.

Awař n Yeccu x yinni yumnen d yinni war yuminen ca

³⁷Tuęa Yeccu ittegg ařas n řeeřamat zzatsen, maca waxxa amenni nitni war zzayes uminen, ³⁸ħima ad itwakemmeř wawař n umkacaf Icaęya i innan

“A Sidi, wi yumnen s řexbar nney?

I umi itwassargeb ufus n Arebbi?” Ica. 53:1

³⁹X uyenni war zemmaren ad amnen, minzi Icaęya inna eawed
⁴⁰“Netta issdaryeř tiřawin nsen, isseqseř uřawen nsen, ħima war tettwiřin s tiřawin nsen, war fehħmen s wuř nsen, ad tuben uca necc ad ten ssgenfię.” ⁴¹Inna Icaęya ammu, minzi iřra aeuęi nnes uca tuęa issawař xas. ⁴²Waxxa amenni umnen zzayes ařas n imeqqrannen n řęens, maca s ssibbet n Ifarisiyyen, war zzayes ceħden ca, ħima war xasen ttizzřen zeg usinagug. ⁴³Minzi nitni tuęa xsen aeuęi zeg iwdan x ueuęi zi Arebbi. ⁴⁴Maca Yeccu iřaęa, inna “Wenni dayi ittamnen, war dayi ittimen ca, maca zeg wenni d ayi-d issekken. ⁴⁵Wenni d ayi iřrin, iřra wenni d ayi-d issekken. ⁴⁶Usię-d d tifawt ęar ddunnit, ħima kuř ijjen wenni dayi ittamnen, war ittyimi ca ead di taęest. ⁴⁷Mařa ca n yijjen isřa i wawařen inu uca war yumin, necc war xas ħekkmey ca. Necc war d usię ca ħima ad ħekmey x ddunnit, maca ħima ad ssnejmey ddunnit. ⁴⁸Wenni d ayi isseħqaren uca war iqbiř awařen inu, ęares wenni xas i ęa iħekmen. Awař i nnię, netta ad xas iħkem deg wass aneggaru. ⁴⁹Minzi necc war ssiwřey ca zi ęari, maca Tababat wenni d ayi-d issekken iwca ayi ict n tewşeyyet x min i ęa inię d min xef i ęa ssiwřey. ⁵⁰Necc ssney taşeyyet nnes, aqqa-tt d tudart n řebda. Min ssawařey xenni, ssawařey t am mammecc d ayi inna Tbatat.”

Asird n iđaren n imeħđaren

13 ¹Qbeř i řeid n Basxa, umi Yeccu issen aqqa tasaęeet nnes tiweđ-d belli ad immuři zi ddunnit-a ęar Tbatat awarni řami tuęa ittexs inni ięan nnes, inni ięan di ddunnit, xenni tuęa ittexs iten ař aneggaru. ²Řami ikemmeř umensi, umi iearn ibřis uř

n Yahuda mmis n Simean Isxariyuṭi maḥend ad t isellem, ³uca Yeccu tuḡa issen belli Tababat iwca as kuṛci deg ifassen nnes u belli iffeḡ-d zi ḡar Arebbi u ḡar Arebbi i ḡa irah, ⁴xenni ikkar-d x umensi, ikkes arruḡ nnes, iksi ij n umendiṛ uca ibyes it i yixef nnes. ⁵Xenni ifarreḡ aman di tbanyut uca ibda issirid iḡaren n imeḡḡaren, imesseḡ asen s umendiṛ i zi tuḡa ibyes. ⁶Ṙami d yusa ḡar Simean Buṭrus, inna as wanita “A Sidi, ma tessed ad tessirded iḡaren inu?” ⁷Yarr-d Yeccu, inna as “Cek war tefhimed ca řexxu min tteḡḡeḡ, maca ad tfehmed man aya awarni manawenni.” ⁸Inna as Buṭrus “Qae eemmarṡ ad tessirded iḡaren inu.” Yarr-d xas Yeccu “Maṛa war d ac ssirdeḡ, war ḡarek bu tasyart akidi.” ⁹Inna as Simean Buṭrus “A Sidi, war iḡi iḡaren inu waha maca uṛa d ifassen d uzeḡif.” ¹⁰Yeccu inna asen “Wenni itwassirden, war iḡdij myir ad twassirden iḡaren nnes waha, minzi netta d amezdag amen ikmeṛ. Kenniw tizdigem, maca war iḡi marra.” ¹¹Netta tuḡa issen wi t i ḡa isellmen, x uyenni inna “Kenniw war teḡim ca marra d imezdag.” ¹²Awarni řami tuḡa issirid iḡaren nsen uca yarreḡ arruḡ nnes, xenni iqqim eawed, inna asen “Ma tfehmem min daywem ggiḡ?” ¹³Kenniw tettṛayam ayi ‘Amseṛmad’ d ‘Sidi’ uca tidett i tennam, minzi wa d necc. ¹⁴Maṛa necc d Sidi d Amseṛmad uca ssirdeḡ iḡaren nwem, řexdenni ittxeṡṡ uṛa i kenniw ad tessirdem iḡaren ijjen i wenneḡni, ¹⁵Minzi necc zeema wciḡ awem ij n umedyā, ḡima, am mammec ggiḡ necc akidwem, ad teggem kenniw eawed. ¹⁶S tidett, s tidett ad awem iniy, ismey war yueṛi x sides uṛa d amazan war yueṛi x wenni it-id issekken. ¹⁷Maṛa tessnem timesṛayin-a, ad tiṛim tetwabarkem maṛa teggem zzaysent.

Yeccu izwar issiweṛ x wenni t i ḡa isellmen

Mat. 26:20-25; Mar. 14:17-21; Luk. 22:21-23

¹⁸“War t qqareḡ ca xawem marra. Necc ssney inni i xḡareḡ. Maca ittxeṡṡa ad itwakemmeṛ *min yuran deg wedlis*

‘Wenni i ḡa iccen zeg weyrum akidi, aqqa yarfee xafi anirz nnes.’ sbh. 41:9

¹⁹Řexxu ad awem t iniy qbeṛ mma ad imsar, ḡima, x minni i ḡa imsar, ad tamnem belli aqqa d necc. ²⁰S tidett, s tidett, ad awem

iniy, wenni iqebbřen wenni i d ɣa ssekkey, ad ayi iqbeř u wenni d ayi iqebbřen, ad iqbeř uřa d wenni d ayi-d issekken.”

²¹Awarni řami inna Yeccu man aya, innehweř arruř nnes uca iched, inna “S tidett, s tidett, ad awem iniy, ijjen zzaywem ad ayi isellem.” ²²Imeřđaren xzaren ɣar wayawya, qqimen cekken di min xef tuya issawař. ²³Ijjen zeg imeřđaren nnes i tuya Yeccu ittexs it, tuya isenned x idmaren n Yeccu. ²⁴Isscen Simean Buřrus ɣares, řima ad isseqsa min iena wenni min xef tuya issawař. ²⁵Wanita xenni, umi isenned x idmaren n Yeccu, inna as “A Sidi, min iena?” ²⁶Yarr-d Yeccu “D wenni umi i ɣa ssisney ařeqqim n weyrum, ad as t wcey.” Řexdenni issisen ařeqqim n weyrum, iksi t-id, iwca as t-id i Yahuda mmis n Simean Isxariyuři. ²⁷Awarni i uřeqqim-a n weyrum, yudef it Cciřan. Inna as Yeccu “Min i ɣa tegged, egg it deyya.” ²⁸Uřa d ijj zeg yinni tuya issenden war issin mayemmi netta i d as inna man aya. ²⁹Ittyiř asen i ca zzaysen, umi Yahuda aqqa-t x řřenduq, aqqa Yeccu inna as “Sej min i ɣa neřđaj i řeid!” niy řima ad iwc ca i imezřad. ³⁰Wanita, awarni řami itřef ařeqqim n weyrum, iffey-d deyya. Tuya d řiřet.

Yeccu issawař x řmewt nnes u x tayri jar wawmaten

³¹Řami d iffey, inna Yeccu “Aqqa řexxu itwasseuř Mmis n bnadem uca itwasseuř Arebbi dayes. ³²Mařa Arebbi aqqa itwasseuř dayes, řexdenni Arebbi ad t itwasseuř eawed deg yixef nnes u ad t itwasseuř deyya. ³³A iřenjiren imezyanen, necc aqqa-yi akidwem drus n řweqt ead. Kenniw ad xafi tarzum uca, am mammec nniy i Wudayen, ‘Mani i ɣa rařey necc, war tzemmarem ad d tasem’, ad awem t iniy eawed řexxu. ³⁴Tawřeyyet n jdid i d awem i ɣa wcey řima ad texsem ijjen wenneđni, am mammec necc ttexsey kenniw, uřa d kenniw ad texsem ayawya. ³⁵S man aya ad ssnen marra aqqa kenniw d imeřđaren inu, mařa din ɣarwem tayri jarawem.”

Yeccu izwar issiweř x wenkar n Buřrus

Mat. 26:31-35; Mar. 14:27-31; Luk. 22:31-34

³⁶Simean Buřrus inna “A Sidi, mani i ɣa trařed?” Yarr-d Yeccu “Mani i ɣa rařey necc, war tzemmarem řexxu ad ayi-d teđfared, maca awarni manawenni ad ayi-d teđfared ɣar uneggaru.” ³⁷Buřrus inna as “A Sidi, mayemmi war zemmarey ad cek-d đfarey řexxu?

Necc ad wcey tudart inu i cek.” ³⁸Yarr-d Yeccu “Ma ad ayi tewced tudart nnek? S tidett, s tidett, ad ac iniy, war isquque ca uyaziđ, qbeř mma ad ayi tenkared třata n twařawin.”

Yeccu netta d abrid d tidett d tudart

14 ¹“Ksem anehweř zeg wuřawen nwem. Kenniw tettamnem di Arebbi, amnem eawed zzayi. ²Di taddart n Baba dayes ațtas n tzeddiyin, maelik war iđi amenni, iři nniy awem t. Necc ad raħey ħima ad awem ssewjdey amcan. ³Uca, awarni řami ruħey uca ssewjdey awem amcan, xenni ad eeqbey eawed, ad kenniw d awyey ħari, ħima, mani ġiy necc, ad din tiřim uřa d kenniw. ⁴U mani i ħa raħey aqqa tessnem tt uca tessnem abrid.” ⁵Inna as Tuma “A Sidi, war nessin mani i ħa traħed i mammec nzemmar ad nessen abrid.” ⁶Yeccu inna as “Necc d abrid d tidett d tudart, war d ittis uřa d ijj ħar Tbatat mřir zzayi. ⁷Mařa tuya tessnem ayi, ad tiři aqqa tessnem uřa d Baba. Zi řexxu aqqa tessnem t, teźrim t.” ⁸Filibbus inna as “A Sidi, scen aney Tababat uca ikfa.” ⁹Yeccu inna as “Anect uya n řweqt qaε necc akidwem, ma war d ayi tessined, a Filibbus? Wenni d ayi izřin, izřa Tababat. Mammec teqqared ‘Scen aney Tababat?’ ¹⁰Ma war tumined ca aqqa necc aqqa-yi di Tbatat d Tbatat aqqa-t dayi? Awařen i d awem qqarey, war ten qqarey ca zi ħari, maca Tababat wenni dayi izeddyen, netta ittegg řexdayem nnes. ¹¹Amnem ayi aqqa necc aqqa-yi di Tbatat, Tababat aqqa-t dayi. U mařa war iđi amenni, amnem ayi x ssibbet n řexdayem simant nsent. ¹²S tidett, s tidett ad awem iniy, wenni dayi ittammen, aqqa řexdayem i tteggey, ad zzaysent igg uřa d netta uca ad igg tinni iđan d timeqqranin x man aya, minzi necc ad raħey ħar Baba. ¹³Uca marra min i ħa tettarem s yisem inu, ad t ggey ħima ad itwasseuđ Tbatat s Tmemmit. ¹⁴Min d ayi i ħa tettarem s yisem inu, ad t ggey.

Řwaεd n Arruħ Iqeddsen

¹⁵Mařa texsem ayi, ttfem di tweřsa inu. ¹⁶Uca necc ad zzağey i Tbatat uca ad awem iwc Amsfewwej nneđni ħima ad kiwem iqqim i řebda, ¹⁷Arruħ n tidett wenni war tzemmar ddunnit ad t teqbeř, minzi war t tettwiři, war t tessin. Maca kenniw tessnem t, minzi netta ad kiwem iqqim uca ad daywem yiři. ¹⁸War kenniw ttejjij ca

d iyujiřen. Necc ad ęarwem-d asey. ¹⁹Drus n řweqt ead uca ddunnit war d ayi tzarr ead. Maca kenniw tettwařam ayi, minzi necc ddarey uca uřa d kenniw ad teddarem. ²⁰Deg wass nni ad tessnem belli aqqa necc aqqa-yi di Baba, kenniw dayi u necc daywem. ²¹Wenni ęar ięa tiweřřa inu uca ad daysent iřtef d wenni d ayi ittexsen, u wenni d ayi ittexsen, uřa d Tababat ad t ixš uca necc ad t xsey eawed uca ad as ssecney ixef inu.” ²²Inna as Yahuda, war ięi d Isxariyuři “A Sidi, mammec d aney i ęa tessecned ixef nnek, war ięi ca i ddunnit?” ²³Yeccu yarr-d, inna as “Mařa ca n yijjen ixš ayi, xenni ad iřtef deg wawař inu uca Baba ad t ixš uca ęares i d ęa nas u ęares i ęa nezdey. ²⁴Wenni war d ayi ittexsen, war ittetiřif ca deg wawař inu. Uca awař i tesřim, war ięi ca zi ęari, maca zi Tbatat wenni d ayi-d issekken. ²⁵Ssiwřey akidwem man aya umi necc ead qqimey akidwem. ²⁶Maca Amsfewwej, Arruĥ Iqeddsen, wenni i d ęa issekk Tbatat s yisem inu, ad awem isseřmed kuřci, ad awem issfekkar marra min d awem nniy. ²⁷Řehna ad awem t jjey, necc ad awem wcey řehna inu. War ięi ca am mammec daywem tetticc ddunnit ad t daywem wcey. Kkes anehweř zeg wuřawen nwem, war tteggwed ca. ²⁸Aqqa tesřim necc nniy awem ‘Necc ad uyurey uca ad ęarwem-d asey eawed’. Mařa texsem ayi, ad tfařhem, minzi nniy ‘ad raĥey ęar Tbatat’, minzi Tababat yueřa xafi. ²⁹Necc nniy awem tt řexxu qbeř mma ad imsar, ĥima ad tamnen x minni i ęa yiři uya. ³⁰War kiwem ssiwiřey ead ařtas ktar, ad d yas umeqqrان n ddunnit-a, war ęares walu dayi. ³¹Maca d man aya ĥima ad tesssen ddunnit aqqa necc ttexsey Tababat uca ttegey min d ayi iweřřa Tbatat. Kkarem, ad nuyur ssanita.”

Tazayart d tiředwin nnes

15 ¹“Necc d tazayart n tidett, Baba d bab n weĥwic n tazayart. ²Kuř taseřta dayi i war itticken řęięet, ad tt ikkes uca kuř taseřta i d ittawyen řęięet, ad tt issizdeg, ĥima ad tarni di řęięet. ³Kenniw aqqa twassizzedgem di ssibbet n wawař i d awem nniy. ⁴Qqimem dayi, necc aqqa-yi daywem. Amecnaw taseřta i war izemmaren ad d tawyi řęięet zeg yixef nnes mařa war teqqim di tazayart, amya uřa d kenniw, mařa war dayi teqqimem. ⁵Necc d tazayart, kenniw d tiseřwin. Wenni dayi i ęa iqqimen u necc dayes, netta ad d yawi řęięet ařtas, minzi nnebřa zzayi war tzemmarem

ad teggem walu. ⁶Maña ca n yijjen war dayi iqqim, ad immenđar Ƨar barra amecnaw tasetta, ad yazey, xenni ad tent yarwen, ad tent ndaren di tmessi, ad arġen. ⁷Maca maña teqqimem dayi uca awařen inu ad daywem qqimen, ttarem min texsem uca ad Ƨarwem yiři. ⁸Zi man aya ad itwassuġ Baba xmi i d Ƨa tawyem ațtas n řyġet uca ad tiřim d imehđaren inu. ⁹Am mammec Tababat tuƧa ittexs ayi uřa d necc tuƧa ttexsey kenniw. Qqimem di tayri inu. ¹⁰Maña tețtfem di tweřsa inu, ad teqqimem di tayri inu, am mammec necc tuƧa ttețtfey di tweřsa n Baba uca tțimey di tayri nnes. ¹¹Nniy awem man aya ħima ad daywem tiři řefrahet inu uca ħima ad tetwakemmeř řefrahet nwem. ¹²Tawřeyyet inu tanita, aqqa ad texsem ijjen wenneđni am mammec necc tuƧa kenniw xsey. ¹³Uřa d ijj war Ƨares bu tayri tameqqrant x tanita, belli ad iwc tudart nnes i imeddukař nnes. ¹⁴Kenniw d imeddukař inu, maña teggim am mammec kenniw weřřiy. ¹⁵War tteiwidey ad awem semmiy isemyan, minzi ismey war issin min ittegg sides. Maca necc tuƧa ttrayiy awem d imeddukař, minzi necc ssecney kenniw marra min sřiy zi Baba. ¹⁶War iġi d kenniw i d ayi ixđaren, maca d necc i kenniw ixđaren uca necc ggiy kenniw ħima ad trahem, ad d tawyem řyġet u ħima ad teqqim řyġet nwem, ħima marra min i Ƨa tettarem zi Tbatat s yisem inu, ad awem t iwca netta. ¹⁷D man aya i zi kenniw tteweřřiy, ħima ad texsem ijjen wenneđni.

Ddunnit tcarreh Yeccu d imehđaren nnes

¹⁸Maña ddunnit ad kenniw tcarh, snem aqqa tcarh ayi qbeř kenniw. ¹⁹Maña aqqa kenniw zi ddunnit, iři aqqa ddunnit tuƧa tettexs inni zzayes. Maca minzi kenniw war teġim ca zi ddunnit, maca necc ixđarey kenniw zi ddunnit, s uyenni ddunnit tcarreh kenniw. ²⁰Ċeqřem awař i d awem nniy 'Ismey war yueři x sides.' Maña marrten ayi, ad kenniw marrten eawed. Maña tțfen deg wawař inu, ad tțfen eawed deg wawař nwem. ²¹Maca ad zzaywem ggen man aya marra di ssibbet n yisem inu, minzi nitni war ssinen ca wenni d ayi-d issekken. ²²Maña war d usiy u war kisen ssiwřey, ad yiři war Ƨarsen bu ddnub. Maca řexxu war Ƨarsen bu smařet x ddnub nsen. ²³Wenni d ayi icarrhen, ad icarh uřa d Baba. ²⁴Maña war ggiy jarasen řexdayem i war tent iggi uřa d ijj nneđni, ad yiři war Ƨarsen bu

ddnub. Maca řexxu zrin tent u carhen uřa d Baba.²⁵ Maca ittxeřř ad itwakemmeř wawař i yuran di ttawrat nsen

‘Carhen ayi x walu’. Sbh. 35:19; Sbh. 69:4

²⁶Xmi i d ęa yas Umsfewwej, wenni ęarwem-d i ęa ssekkey zi Tbatat, Arruĥ n tidett i d yusin zi ęar Tbatat, xenni netta ad ayi iched.²⁷ Ad tcehdem uřa d kenniw, minzi tuęa kenniw akidi zeg umezwaru.”

16 ¹⁴“Aqqa ssiwřey akidwem aya ĥima war tendrifem.² Ad kenniw ssuffyen zeg usinagug. Iwa, tasaeet ad d tas umi kuř ijjen wenni kenniw i ęa inyen ad as ittyiř aqqa ittegg řxedmet i Arebbi.³ Ad zzaywem ggen man aya, minzi nitni war ssinen Tababat uřa d necc.⁴ Maca aqqa nnię awem man aya ĥima, xmi i d ęa tas tsaeet, xenni ad tteqřem belli d necc i d awem innan man aya. Necc war daywem nnię ca man aya zeg umezwaru, minzi necc tuęa-yi akidwem.

Yeccu ad issekk Amsfewwej, Arruĥ Iqeddsen

⁵Maca řexxu ad raĥey ęar wenni d ayi-d issekken uca uřa d ij zzaywem war d ayi isseqsi ‘Mani i ęa traĥed?’⁶ Maca minzi nnię awem man aya, aqqa ccuren uřawen nwem s wecđan.⁷ Maca necc ad awem inię tidett, ĥsen awem ad raĥey. Mařa war ruĥey ca, war ęarwem-d ittis Umsfewwej. Mařa ruĥey, ad awem t-id ssekkey.⁸ Řami d yusa wanita, ad isseqneē ddunnit x ddnub x tsegda u x řĥukm.⁹ X ddnub minzi nitni war zzayi uminen ¹⁰uca x tsegda, minzi necc ad raĥey ęar Baba uca war d ayi tzarrem ead ¹¹uca x řĥukm minzi ameqqran n ddunnit-a aqqa itwahaseb.¹² Yari ařtas min daywem i ęa inię, maca řexxu war tzemmarem ad t teksim.¹³ Maca řami d yusa Arruĥ n tidett, ad kenniw indeh di marra tidett, minzi netta war issiwiř ca zeg yixef nnes, maca marra min i ęa isřa, ad zzayes issiweř uca ad awem isscen timesřayin i d ęa yasen.¹⁴ Netta ad ayi isseuę, minzi ad iksi zi min ęari uca ad kenniw issxebbar zzayes.¹⁵ Marra min ięan ęar Tbatat, aqqa-t inu. S uyenni nnię belli netta ad iksi zi min ęari uca ad kenniw issxebbar zzayes.¹⁶ War ittyimi ca uca war d ayi tzarrem u xenni eawed war ittyimi ca uca ad ayi tzarem eawed, minzi necc ad raĥey ęar Tbatat.”

¹⁷Ca zeg imeħdaren nnes nnan jarasen “Ma man aya min d aneġ inna ‘War ittyimi ca uca war d ayi tżarrem u xenni eawed war ittyimi ca uca ad ayi tżarem eawed, minzi necc ad raħeġ ġar Tbatat’ ”? ¹⁸Xenni nnan “Min ixs ad yini min iqqar ‘War ittyimi ca’? War nessin ca min xef issawař.” ¹⁹Issen Yeccu aqqa nitni xsen ad t sseqsan, xenni inna asen “Ma temmesseqsam minzi nniġ ‘War ittyimi ca uca war d ayi tżarrem u xenni eawed war ittyimi ca uca ad ayi tżarem eawed’? ²⁰S tidett, s tidett, ad awem iniġ aqqa ad trum, ad tesyuyem, maca ddunnit ad tfařħ. Kenniw ad tceđnem, maca ačđan nwem ad idweř d řefraħet. ²¹Tamġart, xmi i ġa tařu, ad tffugem minzi tasaeeet nnes aqqa tiweđ-d. Maca xmi i ġa tařu aħenjir, war tfekkar ca ead di řeħriq nnes zi řefraħet minzi tarni-d ij n bnadem ġar ddunnit. ²²Uřa d kenniw aqqa daywem ačđan řexxu, maca ad kenniw zareġ eawed uca ad farħen wuřawen nwem uca uřa d ijj war zzaywem ittekkes řefraħet nwem. ²³Deg wass nni war d ayi tettseqsam ca. S tidett, s tidett, ad awem iniġ, marra min i ġa tettarem i Tbatat s yisem inu, ad awem t iwc. ²⁴Ař i řexxu war tettarem ca s yisem inu. Ttarem, ad teksim, ħima ad tiři řefraħet nwem tekmeř. ²⁵Ssiwřeġ awem x man aya s imettiřen, maca ad d taweđ tsaeeet i di war ġarwem i ġa ssiwiřeġ ead s imettiřen, maca ad awem-d barrħeġ x Tbatat s bťayťay. ²⁶Deg wass nni ad tettarem s yisem inu. Necc war d awem qqareġ ca belli ad ttareġ i Tbatat di tťwee nwem, ²⁷minzi Tababat simant nnes ittexs kenniw, minzi kenniw tuya tettexsem ayi uca aqqa tumnem aqqa necc zi ġar Arebbi i d ffyeġ. ²⁸Ffyey-d zi Tbatat, usiġ-d ġar ddunnit. Ad jjeġ necc eawed ddunnit uca ad raħeġ ġar Tbatat.”

²⁹Nnan as imeħdaren nnes “Aqqa řexxu cek tessawařed s bťayťay, war tessiwiřed ca s imettiřen. ³⁰Řexxu nessen aqqa tessned kuřci, war teħdijed ad cek isseqsqa ħed. Zi manawenni numen aqqa d cek teffyed-d zi Arebbi.” ³¹Yeccu yarr-d xasen “Ma řexxu tumnem? ³²Ad d taweđ tsaeeet, aqqa tiweđ-d, i di i ġa tetwazeġeem, kuř ijj ad iťtef abrid nnes, ad ayi tejjem weħdi. Maca necc war ġiġ bu weħdi, minzi Tababat aqqa-t akidi. ³³Aqqa ssiwřeġ akidwem s man aya ħima ad ġarwem yiři řehna dayi. Di ddunnit ad ġarwem tiři řeħřart, ggem uř, necc aqqa yełlbey x ddunnit.”

Tazaġit n Yeccu

17 ¹Tuġa Yeccu issawař s man aya uca issgaæeed titřawin nnes ġar ujenna, inna "A Baba, aqqa tasaæeet tiweđ-d. Sueřa Mmic, ħima uřa d Mmic ad cek issueřa, ²am mammec d as tewcid řřuřta x kuř aysum, ħima xenni netta ad iwc tudart n řebda i kuř iġen i d as tewcid. ³D tanita d tudart n řebda, aqqa nitni ad cek ssnen, aqqa cek d Arebbi d tidett weĥdec d Yeccu Lmasiř wenni i d tessekked. ⁴Necc ssueřiy cek x tmurt. Necc kemmřey řxedmet i d ayi tewcid ħima ad tt ggey. ⁵Řexxu řeuġi ayi, a Tababat, ġar ixef nnek s ueuġi i tuġa ġari qbeř mma ad tiři ddunnit. ⁶Seccney isem nnek i iwdan inni d ayi tewcid zi ddunnit. Nitni tuġa-ten nnek, tewcid ten i necc, aqqa řřfen deg wawař nnek. ⁷Ssnen řexxu belli marra min d ayi tewcid, aqqa-t zzayek. ⁸Minzi necc wciy asen awařen i d ayi tewcid uca nitni qebřen zzaysen, ssnen s tidett belli necc ffyey-d zzayek, umnen aqqa cek tessekked ayi-d. ⁹Necc ttarey di řřwee nsen, war ttettarey di řřwee n ddunnit maca di řřwee n yinni i d ayi tewcid, minzi aqqa-ten nnek. ¹⁰Marra min iġan inu aqqa-t nnek u min iġan nnek aqqa-t inu. Necc twasseuġey daysen. ¹¹Necc war ġiy ead di ddunnit, maca nitni aqqa-ten di ddunnit uca necc ad ġarek-d asey. A Tababat iqeddsen, ĥda ten deg isem nnek, inni i d ayi tewcid ħima nitni ad iřin d iġen am neccin. ¹²Mintra aqqa-yi akidsen, ad ten ĥdiy deg isem nnek. Necc eessey x inni i d ayi tewcid, war itwahellek uřa d iġj zzaysen myir mmis n lhalak ħima ad ikemmeř wedlis. ¹³Maca řexxu ad ġarek-d asey u ssawařey x man aya di ddunnit ħima ad tiři řefraĥet inu tekmeř daysen. ¹⁴Wciy asen awař nnek uca ddunnit tuġa tcarreh iten minzi war ġin ca zi ddunnit am necc war ġiy ca zi ddunnit. ¹⁵Necc war ttarey ħima ad ten teksid zi ddunnit, maca ħima ad ten teĥđid zi tuæeffna. ¹⁶Nitni war ġin ca zi ddunnit am necc war ġiy ca zi ddunnit. ¹⁷Qeddes iten di tidett, awař nnek d tidett. ¹⁸Am mammec i d ayi-d tessekked ġar ddunnit, ssekkey ten eawed ġar ddunnit. ¹⁹Ttqeddasey ixef inu di řřwee nsen, ħima ad twaqeddsen uřa d nitni di tidett. ²⁰War ttarey di řřwee n yina waha, maca eawed di řřwee n yinni dayi yumnen s wawař nsen. ²¹Ĥima ad iřin marra d iġen, a Tababat, am cek dayi u necc dayek, ħima uřa d nitni ad iřin d iġen dayney, ħima ad tamen ddunnit belli aqqa d cek i d ayi-d issekken. ²²Necc wciy asen æuġi i d ayi tewcid, ħima ad iřin d iġen am mammec neccin neġa d iġen. ²³Necc daysen,

cek dayi, ħima ad iřin twakemmřen yar ijjen, ħima ad tessin ddunnit aqqa cek tessekke ayi-d u tessed ten am mammec i d ayi tessed. ²⁴A Tababat, xsey i inni i d ayi tewcid ad iřin akidi mani mma ġiğ necc uca ad żaren aeuġi inu i d ayi tewcid, minzi cek tessed ayi qbeř mma ad tetwagg ddunnit. ²⁵A Tababat iseggdin, aqqa ddunnit war cek tessin, maca necc aqqa ssney cek u ina ssnen aqqa cek tessekke ayi-d. ²⁶Necc ssecney asen isem nnek u ad t ssecney, ħima tayri i zi tuya d ayi tettetted ad tiři daysen u necc daysen.”

Uđuf n Yeccu

Mat. 26:47-56; Mar. 14:43-50; Luk. 22:47-53

18 ¹Awarni řami inna Yeccu aya, iffeğ ak-d imeħđaren nnes, żwan x yeyżar n Qidrun, tuya din ij n weħwic, yudef dayes ak-d imeħđaren nnes. ²Uřa d Yahuda wenni t isellmen, issen amcan nni ewed, minzi Yeccu tuya issmuna dayes ařtas ak-d imeħđaren nnes. ³Xenni yiwi-d Yahuda akides ict n terbiet n řeskar d imxazniyyen n arruyas n ikehhanen d Ifarisiyyen uca yusi-d diha s řeqnadeř d iřefđawen d řesnaħ. ⁴Yeccu xenni, umi issen marra min d as i ġa imsaren, iffeğ-d, inna asen “Min tarezzum?” ⁵Arrin-d xas “Yeccu Nnařiri.” Inna asen “D necc.” Tuya Yahuda, wenni t isellmen, ibedd ewed akidsen. ⁶Řami d asen inna “D necc”, dewřen ġar đeffar uca wđan ġar tmurt. ⁷Isseqsa ten ewed “Min tarezzum?” Nnan “Yeccu Nnařiri.” ⁸Yeccu yarr-d “Aqqa nniğ awem, aqqa d necc. Mařa tarezzum xafi, ĵjem ina ad rařen”, ⁹ħima ad itwakemmeř wawař i tuya inna “Inni i d ayi tewcid, war zzaysen weddareğ uřa d ijj.” ¹⁰Simėan Buřrus xenni, am tuya ġares ssif, ijbied it-id, iwta zzayes ismey n uzeğif n ikehhanen, iqeřř as amezzuğ nnes afusi. Tuya ismey nni qqaren as Malxis. ¹¹Xenni inna Yeccu i Buřrus “Arr ssif ġar weğřaf nnes, řkas wenni d ayi iwca Tbatat, ma war t sessey?”

Yeccu zzat i uzeğif n ikehhanen

Mat. 26:57-58; Mar. 14:53-54; Luk. 22:54

¹²Tarbieť d ukumandar d imxazniyyen n Wudayen řřen Yeccu, carfen t. ¹³Nedhent amezwaru ġar Hannan, minzi netta d ađekkwař n Qayafa, wenni tuya d azeğif n ikehhanen deg useggwas nni.

¹⁴Qayafa d netta tuya iweſſa i Wudayen, aqqa ħsen ad immet ijj n bnađem di ttewwen n weydud.

Ankar n Buṭrus

Mat. 26:69-70; Mar. 14:66-68; Luk. 22:55-57

¹⁵Simean Buṭrus tuya iđeffar Yeccu ak-d ij n umehđar nneđni. Ameđdar nni tuya itwassen ħar uzeđif n ikehhanen uca yudef ak-d Yeccu ħar řemraħ n taddart n uzeđif n ikehhanen. ¹⁶Buṭrus ibedd-d barra ħar tewwart. Iffey-d umehđar i tuya itwassnen ħar uzeđif n ikehhanen, issiweř ak-d teessast tenni iħeṭṭan tawwart uca issidef-d Buṭrus ħar daxeř. ¹⁷Tayya tenni iħeṭṭan tawwart tenna i Buṭrus “Ma war teđid cek zeg imeđdaren n bnađem-a?” Inna “Nec, lla.” ¹⁸Tuya isemyan d imxazniyyen bedden *din*, ssaryen timessi s řefhem, minzi tuya tesmeđ uca tuya ttweqqaħen. Uřa d Buṭrus ibedd akidsen, ittweqqaħ.

Iseqsiten n uzeđif n ikehhanen i Yeccu

Mat. 26:59-66; Mar. 14:55-64; Luk. 22:66-71

¹⁹Isseqsa uzeđif n ikehhanen Yeccu x imeđdaren nnes u x tyuri nnes. ²⁰Yarr-d xas Yeccu “Nec tuya ssawařey i ddunnit s btařtay, ssyarey řebda deg usinagug u di taddart iqeddsen mani ttmunen Wudayen řebda uca di tnuffra war ssiwřey uřa d ict n řħajet. ²¹Mayemmi d ayi tesseqsid? Seqsa inni isřan min d asen nniy. Xzar, nitni ssen min nniy.” ²²Řami inna ammu, xenni ijjen zeg imxazniyyen i tuya ibedden dinni iwca i Yeccu ij n umeddarđar, inna “Ma ammu i ħa tarred x uzeđif n ikehhanen?” ²³Yarr-d xas Yeccu “Mařa ssiwřey min war iħřin, ched x min war iħřin, maca mařa ssiwřey mliħ, mayemmi d ayi teccated?” ²⁴Tuya Hannan issekk it itwacarf ħar Qayafa, azeđif n ikehhanen.

Ankar n Buṭrus i twařa nneđnit

Mat. 26:71-75; Mar. 14:69-72; Luk. 22:58-62

²⁵Tuya Buṭrus ibedd dinni ittweqqaħ. Nnan as “Ma war teđid uřa d cek zeg imeđdaren nnes?” Netta inkar, inna “War ħiy ca d nec” ²⁶Ijjen zeg isemyan n uzeđif n ikehhanen i tuya itteenan i wenni umi iqeřş Buṭrus amezzuğ, inna “Ma war cek zřiy akides di teħwict?” ²⁷Řexdenni inkar Buṭrus eawed uca deyya isquqee uyaziđ.

Yeccu zzat i Bilaṭus

Mat. 27:1-2, 11-31; Mar. 15:1-20; Luk. 23:1-25

²⁸Xenni iwyen-d Yeccu zi Qayafa ġar taddart n ccræ, tuġa d zic. Nitni war udifen ca ġar řfusina, ħima war ttwassixen, maca zemmaren ad ccen zi *macca n řeid n Basxa*. ²⁹Iffey-d ġarsen Bilaṭus, inna “Man acetci i ġarwem x bna-dem-a?” ³⁰Arrin-d, nnan as “Mařa wa war tuġi ittegg tuġeffna, ad tiři war d ac t-id nettiwi.” ³¹Inna asen Bilaṭus “Awyem t-id kenniw, tħekmem xas eļaħsab ttawrat nwem.” Xenni nnan as Wudayen “War ġarney bu řħeqq ad neny uřa d ijj,” ³²ħima ad itwakemmeř wawař n Yeccu i tuġa iqqar, am tuġa isscanen i man řmewt i ġa immet. ³³Xenni yudef-d Bilaṭus eawed ġar taddart n ccræ, iřaġa x Yeccu, inna as “Ma cek d ajeġid n Wudayen?” ³⁴Yarr-d xas Yeccu “Ma teqqared aya zi ġarek niġ tuġa innedni qqaren ac t xafi?” ³⁵Yarr-d Bilaṭus “Ma attay necc d Uday? Aqqa řgens nnek d arruyas n ikehhanen iwyen-d cek ġari. Min tuġa teggid?” ³⁶Yarr-d xas Yeccu “Tageldit inu war teġi ca zi ddunnit-a. Mařa teġa tgeldit inu zi ddunnit-a, ad yiři aqqa ixeddamen inu ad mmenyen ħima war ttetwasellmey ġar Wudayen, maca řexxu tageldit inu war teġi ca ssanita.” ³⁷Bilaṭus inna as “Ma zi xenta cek d ajeġid nican?” Yarr-d Yeccu “Cek teqqared, aqqa necc d ajeġid. I man aya i d xeřqey u i uya i d usiġ ġar ddunnit ħima ad cehdeġ i tidett. Marra wenni iġan zi tidett, ad iseř i tmijja inu.” ³⁸Inna as Bilaṭus “Umi qqaren d tidett?” řami inna ammu, iffey-d eawed ġar Wudayen, inna asen “War dayes ufiġ uřa d ijj n uxettu. ³⁹Maca aqqa tennumem ad awem sarrħey ijj n bna-dem di řeid n Basxa. Ma texsem ad awem sarrħey i ujeġid n Wudayen?” ⁴⁰Sħuyyen eawed marra, nnan “War iġi ca wanita, ħaca Barabbas!”. Tuġa Barabbas d aceffar.

Řħukm x Yeccu s řmewt x řřalib

19 ¹Xenni yiwi Bilaṭus Yeccu uca ihettek it s urekkuđ. ²Uca ieeskariyyen muden as ict n temrist zeg isennanen, ssarsen as tt x uzeġif nnes, nđaren xas aseřħam d azeggway. ³Uca qarrben-d ġares, nnan “Sřam xak, a ajeġid n Wudayen”, ssmeddardaren t. ⁴Iffey-d eawed Bilaṭus, inna asen “Ad awem t-id ssuffyey, ħima ad tessnem belli necc war dayes ufiġ uřa d ijj n řeid.” ⁵Xenni

iffey-d Yeccu s temrist n isennanen d ujeġġab azeggway. Inna asen Bilaṭus “Xżarem, bñadem!” ⁶Řami t żrin arruyas n ikehhanen d imxazniyyen, sşuyen, nnan “Şellbem t, şellbem t” Inna asen Bilaṭus “Awyem t-id kenniw, tşellbem t, minzi necc war dayes ufiy bu řeib.” ⁷Arrin-d xas Wudayen “Yarney ttawrat. Elaşsab ttawrat nney ittxeşşa ad immet, minzi netta ittarra ixef nnes d Mmis n Arebbi.” ⁸Řami isřa Bilaṭus awař-a, yarni di tiggwudi. ⁹Yudef eawed ħar taddart n ccrae, inna i Yeccu “Manis cek?” Maca Yeccu war xas-d yarri ca. ¹⁰Inna as Bilaṭus “Ma war *texsed ad* kidi tessiwifed? Ma war tessined ca aqqa ħari şşulřa ħima ad cek şellbey u ħari tizemmar ad ac ssarrħey?” ¹¹Yarr-d xas Yeccu “War ħarek bu şşulřa xafi, mařa war d ac temmewc zi sennej, s man aya, wenni d ayi-d ħarek iwyen, aqqa xas ddnub imyar.” ¹²Zi řexdenni tuya Bilaṭus yarezzu ad as isarreħ, maca Udayen sşuyen, nnan “Mařa tsarrħed i weryaz-a, ad tiři war teġid ca d ameddukeř n qayşar. Kuř ijjen wenni ittarran ixef nnes d ajeġid, netta ittėekkas qayşar.” ¹³Řami isřa Bilaṭus i wawař-a, issuffey Yeccu, iqqim x řkursi n ccrae deg wemcan umi qqaren as ‘Azzay n luřa’, qqaren as s teibranit ‘Gabbata.’ ¹⁴Tuya d asewjed i Basxa uca tuya eřaħař d setta. Inna i Wudayen “Xżarem, ajeġid nwem.” ¹⁵Maca nitni sşuyen “Ksim t, ksim t, şellbem t!” Inna asen Bilaṭus “Ma ad şellbey ajeġid nwem?” Arrin-d xas arruyas n ikehhanen “War ħarney bu ujeġid mřir qayşar!” ¹⁶Xenni isellem asen t ħima ad itwaşelleb. Uca nitni ksin Yeccu, awyen t ssenni.

Yeccu yarebbu şşalib

Mat. 27:32-44; Mar. 15:21-32; Luk. 23:26-39

¹⁷Uca iffey am yarbu simant nnes şşalib ħar wemcan umi qqaren ‘Taceqquft n uzeġif’, umi qqaren s teibranit ‘Gulguta’, ¹⁸şellben t dinni uca şellben akides tnayen nneđni, ssa d ssa u Yeccu di řwest. ¹⁹Yura Bilaṭus ca n tira, issars itent x şşalib. Itwari di tira-ya ‘Yeccu Nnaşiri, Ajeġid n Wudayen.’ ²⁰Tira-ya řrin tent ařřas n Wudayen, minzi amcan mani tuya şellben Yeccu yudes-d i tendint. Tira-ya twarint s teibranit d tlatinit d tyunanit. ²¹Nnan arruyas n ikehhanen n Wudayen i Bilaṭus, “War ttari ca ‘Ajeġid n Wudayen’, maca ‘Wanita inna: Necc d Ajeġid n Wudayen.’” ²²Yarr-d xasen Bilaṭus “Min uriy, aqqa uriy t.” ²³Řami semmaren ieeskariyyen Yeccu x şşalib, ksin arruđ nnes, bđan t x

arebea n tseqqar, i kuř aeskari ict n tesyart, uca ksin eawed tcamir. Tuya tcamir nnebřa taxeyyař, tetwaxeyyed qae zi sennej. ²⁴Nnan i wayawya “War t nettcarriř ca, ad xas negg akeccuđ, ad nřar wi t i řa wawyen, řima ad itwakemmeř wedlis i iqqaren

“Bđan arruđ inu jarasen u x warruđ inu ggın akeccuđ.” *Sbh.* 22:18

Man aya i iggin ieskariyyen. ²⁵Yar řřalib n Yeccu tbedd yemmas d weřmas n yemmas d Maryem tamyart n Klubas d Maryem n Majdala. ²⁶Řami izra Yeccu yemmas d umehđar wenni tuya ittexs, bedden zzates, inna i yemmas “A tamyart, wa d mmim!” ²⁷Řexdenni inna i umehđar “Aqqa-c yemmac!” Zi tsaeeet nni iksi tt umehđar řar taddart nnes.

Řmewt n Yeccu x řřalib

Mat. 27:45-56; Mar. 15:33-41; Luk. 23:44-49

²⁸Awarni man aya, umi issen Yeccu aqqa kuřci tuya itwakemmeř, řexdenni řima ad itwakemmeř wedlis, inna

“Necc fudey.” *Sbh.* 22:15; 69:21

²⁹Tuqa din ij n uřarraf iccur s řxeř, sşyedşen ict n sbunxa n hisub s řxeř uca ggın tt x uyanim, ssiwđen as tt řar uqemmum nnes. ³⁰Řami iqqas Yeccu řxeř, inna “Aqqa itwakemmeř!” Uca yuđar azeřif nnes, isellem arruř nnes. ³¹Umi tuqa ass n usewjed n Basxa u řima war ttıymın arrimat nsen x řřalib di ssebt, minzi wass n ssebt nni tuqa d ameqqran ařřas, ttaren Wudayen zi Bilařus řima ad twarzen iđaren nsen uca ad ten ssiggwjen. ³²Usin-d ieskariyyen, arzin iđaren n umezwaru u n wenneđni i tuqa ad kis twaşellben. ³³Maca řami d usin řar Yeccu, war arzin ca iđaren nnes umi řrin aqqa immut. ³⁴Maca ijjen zeg ieskariyyen issnuqqeb it s ict n řřitca deg uyezdıis nnes uca ffyen-d idammen d waman deyya.

³⁵Wenni izřin man aya, tuqa iched u chadet nnes d tidett. Netta issen, aqqa iqqar tidett, řima ad tamnem uřa d kenniw. ³⁶Timesřayin-a msarent, řima ad itwakemmeř wedlis i iqqar

“War zzayes ittarezzi yiyes.” *Ufř.* 12:46; Řxř. 9:12; *Sbh.* 34:20

³⁷Uca ij n wawař nneđni zeg wedlis iqqar

“Nitni ad xżaren wenni t issnuqqben.” Zak. 12:10

Andeř n Yeccu

Mat. 27:57-61; Mar. 15:42-47; Luk. 23:50-56

³⁸Awarni man aya Yusef zi Arimatiya, wenni tuća d ij n umehđar n Yeccu maca s tnuffra zi tiggwudi zeg Wudayen, ittar as i Bilařus ttesriħ ħima ad iksi arrimet n Yeccu uca Bilařus isarreħ as. Xenni yusi-d, iksi arrimet n Yeccu. ³⁹Yusi-d eawed Nikudimus wenni tuća ħares-d yusin tawařa tamezwarut s ħiřet, yiwi-d akides axeġeđ n řefwaħet n mirru d ssibři eřaħař meyya iređřen. ⁴⁰Xenni ksin arrimet n Yeccu, řeħħfen tt di řecfun ak-d řeçtur, am mammec nnumen tteġgen tt Wudayen i wendeř. ⁴¹Tuća din ij n weħwic deg wemcan mani t šellben uca deg weħwic ij n wendeř n jdid, eemmarř war dayes neđřen uřa d ijj. ⁴²Neđřen Yeccu din zi ssibbet n usewjed n Wudayen, minzi andeř nni tuća yudes.

Andeř n Yeccu ixwa

Mat. 28:1-10; Mar. 16:1-8; Luk. 24:1-12

20 ¹Deg wass amezwaru n ssimana tusi-d Maryem n Majdala zic ħar wendeř, tuća ead d taġest uca teżra tařđart aqqa temmeksi x wendeř. ²Tuzzeř-d, tusi-d ħar Simean Buřrus u ħar umehđar nneđni wenni tuća ittexs it Yeccu, tenna asen “Ksin Yeccu zeg wendeř, war nessin mani t ggin.” ³Iffey-d Buřrus d umehđar nneđni uca usin-d ħar wendeř. ⁴Nitni uzzřen s tnayen idsen. Amehđar nneđni izwar i Buřrus uca yiweđ d amezwaru ħar wendeř. ⁵Yuđar, izra řecfun mmarsen, maca netta war yudif ca. ⁶Yusi-d Simean Buřrus, wenni it-id iđfaren uca yudef deg wendeř, izra řecfun mmarsen *din*, ⁷maca amendiř wenni tuća x uzeġif nnes, war immars ca ak-d řecfun, maca tuća iđfeř deg wemcan weħdes. ⁸Řexdenni yudef-d uřa d amehđar nneđni, wenni d yusin d amezwaru ħar wendeř, izra man aya uca yumen. ⁹Minzi nitni tuća ead war ssinen adlis, belli ittxeřř as ad ikkar zeg imettinen.

Ađhar n Lmasih i Maryem zi Majdala

Mar. 16:9-11

¹⁰Xenni dewřen imeđdaren ɣar taddart nsen. ¹¹Maca Maryem teqqim tbedd ɣar wenđer barra, tettru. Řami tuya tettru, tuđar ɣar wenđer, ¹²tezra tnayen n lmalakat s warruđ d acemřař, qqiment mani tuya temmars arrimet n Yeccu, ijjen ɣar uzeğif, ijjen ɣar idaren. ¹³Nnan as “A tamɣart, mayemmi tettrud?” Tenna asen “Kksin Sidi inu, war ssiney mani t ssarsen.” ¹⁴Umi tenna man aya, tenneqřeb ɣar đeffar, tezra Yeccu ibedd, maca war tessin ca aqqa-t d Yeccu. ¹⁵Yeccu inna as “A tamɣart, mayemmi tettrud? Min xef tarezzud?” Tettyiř as netta d bab n teħwict, tenna as “A Sidi mařa cek it iksin, ini ayi mani t tessarsed, ad t ksiy.” ¹⁶Yeccu inna as “A Maryem!” Nettet tenneqřeb, tenna as s tɛbranit “Rabbuni!”, min ix s ad yini ‘A Amseřmad!’ ¹⁷Yeccu inna as “War d ayi tthada, aqqa necc ead war gaεdey ca ɣar Baba, maca ruħ ɣar aytma, ini asen ‘Necq aqqa ad gaεdey ɣar Baba d Babatwem, ɣar Arebbi inu d Arebbi nwem.’ ” ¹⁸Teεqeb-d Maryem n Majdala tessxeɓbar imeđdaren belli nettet tezra Arebbi u belli netta inna as man aya.

Ađhar n Lmasih i imeđdaren nnes

Mat. 28:16-20; Mar. 16:14-18; Luk. 24:36-49

¹⁹Yar tmeddit n wass nni, netta d amezwaru n ssimana, tuya tiwwura qqnent mani tuya munen imeđdaren s tiggwudi zeg Wudayen uca yusi-d Yeccu, ibedd di řwest, inna asen “Sřam xawem.” ²⁰Awarni řami inna aya, immeř asen ifassen nnes d uyezdis nnes. Farřen imeđdaren řami zřin Sidi. ²¹Inna asen eawed Yeccu “Sřam xawem, am mammec d ayi-d issekk Tbatat, uřa d necc ad kenniw-d ssekkey.” ²²Awarni řami inna man aya, iřuđ daysen, inna asen “Qeřrem Arruħ Iqeddsen.” ²³Wenni umi i ɣa teyfarem ddnub, ad as twayfaren ddnub nnes. Wenni umi d as i ɣa tetřfem di ddnub nnes, ad as twatřfen ddnub nnes.” ²⁴Maca Tuma, ijjen zi tenεac, wenni umi qqaren ‘Acniw’, war tuyi ca akidsen, řami d yusa Yeccu. ²⁵Nnan as imeđdaren nneđni “Aqqa nezra Sidi!” Maca netta inna asen “Mařa war zřiy řimařt n imesmiren deg ifassen nnes, ad ssarsey ađad inu deg wemcan n imesmiren uca ad ssarsey afus inu deg uyezdis nnes, war ttimney.” ²⁶Awarni tmenya n wussan udfen imeđdaren

nnes eawed ɣar daxeř u tuɣa Tuma akidsen. Yusi-d Yeccu, waxxa tiwwura tuɣa qqnent, uca ibedd-d di řwest inna “Sřam xawem!”²⁷Inna i Tuma “Awi-d ađað nnek, xzar deg ifassen inu, sars afus nnek x uyezdis inu, war jehheř ca, maca amen.”²⁸Yarr-d Tuma, inna as “A Sidi inu d Arebbi inu!”²⁹Inna as Yeccu “S minzi cek d ayi tezrid, ma tumned? Sseed n inni yumnen, waxxa nitni war *dayi* zrin.”

³⁰Yeccu igga ařtas n řeeřamat nneđni qibač i imeħđaren nnes, tinni war yurint ca deg wedlis-a.³¹Maca tina urant ħima ad tamnem belli Yeccu netta d Lmasiħ, Mmis n Arebbi uca ħima, am tettamnem, ad ɣarwem tiři tudart s yisem nnes.

Yeccu d tyemmart tameqqrant n iseřman

21 ¹Awarni uya tuɣa Yeccu immeř ixef nnes eawed i imeħđaren ɣar řebħar n Tibiriyas, idħar-d ammu.²Tuɣa din jmie Simean Buřrus d Tuma, wenni umi qqaren ‘Acniw’, d Natanayil, wenni tuɣa zi Qana di tmurt n Ljalil, d tarwa n Zabadi, d tnayen nneđni zeg imeħđaren nnes.³Inna asen Simean Buřrus “Nec ad raħey ad ymarey *iseřman*.” Nnan as “Ad kik nraħ uřa d neccin.” Ffye-d uca nyin deyya di tyarrabut. Di ġiřet nni war řtifen walu.

⁴Yar řřbeħ zic, ibedd Yeccu x tma n řebħar. Maca imeħđaren war ssinen ca aqqa d Yeccu.⁵Inna asen Yeccu “A iħenjiren, ma attay ɣarwem ca n iseřman?” Arrin-d xas “Llal!”⁶Inna asen “Nđaren tracca ak-d uyezdis afusi n tyarrabut, ad tafem.” Xenni nđaren tracca uca war zemwaren ad t-id jebden s ubarru n iseřman.⁷Inna umehđar wenni i tuɣa ittexs it Yeccu i Buřrus “Aqqa netta d Sidi.” Řami isřa Simean Buřrus aqqa netta d Sidi, ibyes arruđ nnes minzi tuɣa d aearyan, inđar ixef nnes di řebħar.⁸Maca imeħđaren innedni usin-d s tyarrabut minzi war iggwijen ca x řbarr myir mitayn n iyağen (=eřaħař 100 mitru) uca nitni jebden-d tracca s iseřman.

⁹Řami d ffyen ɣar řbarr, zrin diha afennic n řefħem mani mmarsen iseřman d weyrum.¹⁰Inna asen Yeccu “Awyem-d zeg iseřman i teymarem řexxu.”¹¹Simean Buřrus yuyur, ijbed tracca teccur s iseřman imeqqranen ɣar řbarr, aqqa-tt dayes meyya u třata u xemsin. Waxxa dayes s wanect uya ařtas, war tcarreg ca tracca.¹²Inna asen Yeccu “Araħem-d da, ad tariyyqem.” Uřa d ijj

zeg imeĥdaren war izeim ad t isseqsa ‘Min teġnid cek?’. Ssnen aqqa-t d Yeccu. ¹³Ġrexdenni yusi-d Yeccu iksi ayrum, iwca asen t uca ammu uġa d iseġman. ¹⁴Wanita d tawaġa wiss tġrata i d iġhar Yeccu i imeĥdaren nnes awarni ġami d itwassnekkar zeg imettinen.

Yeccu ittseqsa Buġrus “Ma tettexsed ayi?”

¹⁵Awarni ġami ariyyqen, inna Yeccu i Simean Buġrus “A Simean, mmis n Yuna, ma tettexsed ayi ktar zeg yina?” Inna as “Wah, a Sidi, cek tessned aqqa necc ttexsey cek.” Inna as “Arwes izmaren inu.”

¹⁶Inna as εawed “A Simean, mmis n Yuna, ma tettexsed ayi?” Inna as “Wah a Sidi, cek tessned aqqa necc ttexsey cek.” Inna as “Arwes uġi inu.” ¹⁷Inna as wiss tġrata “A Simean, mmis n Yuna, ma tettexsed ayi?” Iċċen Buġrus minzi inna as t wiss tġrata ‘Ma tettexsed ayi?’, uca inna as “A Sidi, cek tessned kuċci, tessned aqqa necc ttexsey cek.” Inna as Yeccu “Arwes uġi inu. ¹⁸S tidett, s tidett, ad ac iniy, ġami tuġa cek d amezyan, tbeysed i yixef nnek, truĥed mani tersed, maca x minni i ġa tewsared, ad tesswizzded ifassen nnek uca wennedni ad ac ibyes uca ad cek yawi ġar mani war tettexsed.” ¹⁹Inna ammu ĥima ad isscen i man ġmewt i zi i ġa isseuġ Arebbi.

Ġami d as inna ammu, inna as “Dġfar ayi-d!” ²⁰Inneqġeb Buġrus, iġra amehġar wenni i tuġa ittexas it Yeccu, iġfar it, netta d wenni i tuġa isennden x idmaren nnes ġar umensi, inna “A Sidi, wi cek i ġa isellmen?” ²¹Ġami iġra Buġrus wa, inna i Yeccu “A Sidi, i wa, min d as i ġa imsaren?” ²²Inna as Yeccu “Maġa xsey ad iqqim aġ i d ġa εeqbey, i min d ac iruĥen? Cek dġfar ayi-d!” ²³Uca iffey-d wawaġ-a ġar wawmaten belli amehġar nni war ittmetti ca, maca Yeccu war d as inni ca belli netta war ittmetti ca, maca “Maġa xsey ad iqqim aġ i d ġa εeqbey, i min d ac iruĥen?”

²⁴D wa d amehġar wenni icehĥden s man aya uca netta yura man aya, u neccin nessen aqqa chadet nnes d tidett. ²⁵Aqqa din εad aġtas n tmesġayin nneġni i igga Yeccu. Maġa twarint ict awarni tennednit, ad ayi ittyiġ, ad tiġi ddunnit simant nnes war ġares bu ttasie ĥima ad teksi idlisen i ġa itwarin. Amin!